

壽

序

錫山顧子天石與予訂交且三十年或之燕趙或之楚
或之粵或還其鄉或往來齊魯間而予家歲歲賓筵實
未嘗少一顧子也顧子之行甚踈跡甚遠若海鴻之冥
冥焉乃不肯旦夕棄予則余與顧子之臭味可知矣當
其尊人修遠公操觚論文凡遊辟疆之園者莫不物色
天石今屈指辟疆園中駢肩問業者多已致位卿相懸
車歸老矣乃天石獨甘心泉石者何蓋天石之行甚踈
跡甚遠雖能承其家學每不屑屈志鄉相以乞援引又

不屑狎比其友以標聲望一登蹇驢則風塵萬里一入扁舟則煙雨經年落落穆穆自游自息誰復記憶天石者其所著文辭大都水村山店蕭寺旗亭與漁樵落落之士相問答者然舉天下之風俗形勝無弗識也舉古今之人物事變成敗利害無弗悉而應世之經權無弗通也其生平氣槩既恬淡而不爭其所著文辭亦漫滅而不惜世之人將莫不忽視我顧子矣予於其來也觴之以酒而握其手曰是吾之過也夫是吾之過也夫昔椰子厚送韋七秀才曰京兆韋中立其文懿且高其行

愿以恒其藝益工久與居益見其賢然而進三年連不勝是殆拙于爲聲者歟穀梁子云心志旣通而名譽不聞友之過也古者名譽不至罪其友不以罪有司則顧子亦如韋生但仗其文欲自得於有司抑豈古人之道哉予乃倒其囊篋得古文傳記書序若干紙騷賦詞曲又若干紙予皆未遑卒讀獨諸體詩若干紙予特好而三復之然後知其詩不同於今人之詩也今之取貴顯者其所爲詩亦不過以帖括之意爲之取足應酬而已豈若我顧子之詩立旨深取材精緣境發情緣情別體

行海集 序
漢魏唐宋無所不兼而琢辭鏤藻則高若奇雲妙若異
卉焉秋閣垂簾樹石映發與子弟輩焚香諷咏蓋莫不
心領而神染也因訂其詩八卷梓而行世凡顧子恬淡
而不爭漫滅而不惜者今稍稍爲表著之卽柳子所謂
聲先焉者俾讀之之人心目專一不至眩而不欲視廢
而不欲營則亦友道之當然矣雖然使非顧子鴻飛冥
冥汗漫於燕趙楚粵齊魯吳越之鄉奚以得此徑寸之
詩旨深材精詞高意妙可與當世之取貴顯者拔幟登
壇還我辟疆之舊盟則落落穆穆自游自息之士亦安

可忽也哉丁亥秋七月望闕里孔毓圻撰

嘗讀谷風陰雨之詩而嘆友道之衰也誦伐木嚶鳴之
什而知求友之難也友居五倫之一相合以義相知以
心較之君臣父子夫婦昆弟尤不易得何也爲其情殷
而遇踈也古之人有云相識滿天下結交難結心要以
知心爲足貴耳今人亦有四方求友而究無一真友者
志不侔也情弗通也情弗通不能久也而求其文章骨
肉臭味金蘭風雨晦明山川不間二十年如一日如顧
天石其人者殆亦鮮矣天石以南國衣冠之後聲名滿
塵寰足跡遍海宇襟懷卓犖度越平流當代名公鉅卿

在溪齋集
一
罔不物色而折節之交游雖廣契合實少與世之落落寡合者無異人有譏其負盛氣矜名節蹈踈狂白眼傲世而不樂爲世用者而余之重天石者正在此也天石半世之精神畢生之歲月半消磨於趙燕粵楚之墟半耗費於李杜韓歐之集獨於我鄆魯之鄉每低徊而不可解者非以我兩人之知心有可解而不可解者哉回憶訂交之始在康熙丁卯之秋天石來遊闕里余年方髫髻聆其言辭瞻其丰采便已中心藏之矣爾時讀其詩而未得盡讀其詩也交其人而未盡得其真也嗣是過

都越國無不假道過余或一歲而一會或三歲兩歲而一會形迹甚踈心無間焉而余於昔年中心藏之者則又切切焉不能一刻置之矣日月幾何荏苒二十有一年矣今天石飄蓬將老復溯舊遊 家大人館之古泮水之上余與季弟西銘情深舊雨日同筆硯無有間刻晰疑問字頗得其益且倡學步詩社弄月吟風雖同志者多人而邇來聚散存亡不無向曙繁星之感惟九華羅志行表叔喬寓依余秋浦章鼎可爲家學博謀此朝夕者數人而已要皆得天石磨礱切磋之益也則世之

名公鉅卿能物色天石而不能深知天石者余反得快其獨得矣獨是天石以詩名四十年著作若干刻無片紙而猶散帙錯亂 家大人深爲惜之恐其淹沒不彰命余兄弟選其詩八卷且爲之序付之梨棗以問諸世以公同好焉天石仍欲丐余一言余謝之曰言者補其畧也續其餘也無略可補無餘可續將安用之 家大人序之詳矣余又何敢從而置喙於其間乎固辭不得因爲之述其交情如此闕里同學弟孔傳鐸序

序

嘗思李白天地逆旅光陰過客之言而悲之以爲人生倏忽壯者易老若無可以不朽者留於斯世則爲虛負此生也幸而有可以不朽者不亟亟爲之表彰俾傳於後世猶爲虛負此生也不朽之業非必蟠際天地經綸一時凡立言而根於性情依於名教者皆是如唐以詩名世者千百家而獨擅其尤者太白少陵昌黎而已蓋其詩多羈栖逆旅漂泊關山而當無聊不得意之時悉寓忠君愛國之意較諸崔顥王維鄭愔宋之問之流徒

以風雲月露悅媚當時者大相徑庭也其在於我
昭代以詩名者如林第就余見聞所熟形迹所昵者而
言又安有出吾天石顧子之右者哉顧子生平得力之
處大率以李杜昌黎爲寢食其居恒抱負何難蟠際天
地經綸一時而顧子自有其確然之守不苟干進美玉
驪珠固不必不在清廟明堂亦不必不在深山窮谷也
是故風清月白時可賞也江天魚鳥物可興也漁樵隱
逸侶可狎也朱門華屋上賓之坐可據也金戈鐵馬大
將之庭可揖也蒲輪之名束帛之徵可以辭而不往也

怡然與知己相值十日留千日醉以至經年以至數十
年可以留連不去也家伯兄云天石白眼傲世而不爲
世用其人不槩可知乎獨是以詩名世者四十年遊踪
所至燕趙齊梁楚豫閩粵無不有詩而往來我魯則其
最所得詩多者顧子不自知其詩之可以不朽而不復
愛惜余知顧子獨深能不代爲之計乎其在魯也 家
大人旣器而重之恐其詩之不自惜而散佚爲之搜其
佳咏摘其英華彙訂八卷名曰往深齋詩集付之伯兄
與余命爲梓而壽之俾世之學李杜昌黎而未得其真

往溪齋集 序
者庶幾於斯借徑焉則亦可以不朽我顧子矣集成索
序於余余謝以父兄言之既詳無庸復贅 大人謂余
曰易曰鶴鳴在陰其子和之詩曰伯氏吹埙仲氏吹篪
何辭之有余拜而受命援筆以序誌不朽也敢云皇甫
之序三都乎哉

昔

康熙歲在丁亥重陽前二日闕里同學弟孔傳鈺拜撰

往深齋詩集卷一

闕里孔翊宸先生鑒定

錫山顧 彩天石甫著

闕里孔 傳鐸振路 全選

傳鈺西銘

青陽羅筮豫志行校正

五言古詩

擬古十二首

春日樂遊原鶯啼花亦好采桑誰家女玉色何皎皎風

行海齋集 卷一
吹踏歌聲遺響落雲表一聽令人怨再聽令人老繁華
逝相送倏忽成枯槁王孫去不歸鬱鬱生芳草

于闐采花時芳草何芊芊吳姬翠帳暖行遊春暮天共
道花堪妬豈知人可憐明君辭漢月愁撫琵琶絃絃絕
愁無窮平沙起烽煙

迢迢太行山鬱鬱九折坂七月已苦寒飛霜如雪辦策
馬行其中苦饑力復殫蕨薇滿地生采之亦可飯辛勤
不盈掬落日忽已晚人生忘嶮巖何由識平坦

豐城有寶劍繡澁芙蓉青千霄氣百尺一朝遇雷生神

物難久羈飛騰化龍形放逸檻中虎縱失韉上鷹風胡
滅千載夜夜號山精

燭燭晨星光迢迢天河鼓丁丁銀漏響泠泠露華吐騰
騰遊子行切切隔煙語勞勞送客亭潛潛淚如雨生平
曾幾何多半作羈旅

三閭仕不合懷石沉瀟湘宋玉徒招魂無以感楚襄幽
幽志士氣千古托辭章賈生當盛時痛哭甘投荒枳棘
非不榮寧能栖鳳凰至人亦去無然令我傷

吉甫聞伯勞淒然爲垂泣杜宇時哀叫蜀人皆起立物

化情不移憂思終鬱悒莊生亦何爲栩栩作蝴蝶神遊
華胥境浩蕩頗自憐魂夢通羲皇羞與塵世接氣化爲
江河乾坤作舟楫思爲精衛鳥願終填海業

夕與知己話聯床舉素幃青燈膏欲盡山鬼不敢吹砂
論越今古狂言恣雲雷風從西北起紙窓忽自開明月
直射入銀河倒影來呼童浮大白賓主各一杯明日千
里道別恨誠莫裁天寒孤鴈響木落窮猿哀短景易分
手長亭安在哉

狐眠荒壘上見客始驚起鴉集枯木顛逢人亦遠徙斯

地少人煙鳥獸恠相睨借問路幾何離鄉八千里人生
遠爲客惆悵安能已試閱長途人眼中皆老矣

皎皎關山月昔圓今已缺迢迢征戍兒昔存今已歿家
鄉路殊岐音信久懸絕束髮事從軍生歿在恍惚奮身
思報國大將等賤卒忠勇垂丹青黃沙雜膏血君看古
戰場燐火若蟣蝨

白日爾何短青天爾何長虛空歷萬劫太初杳茫茫何
暇論古今春雨忽秋霜羲和無停轡寧不畏魯陽慙無
駐年術兩鬢終易蒼麻姑天上來娉婷坐我傍將錢付

老姆沽酒向餘杭歡樂未終極秦漢皆淪亡飄然乘風去不用還故鄉

古來飲酒客云是謫酒星生爲爛醉徒死則留光明酒酣眠月下浩氣干青冥白眼戲萬乘不啻鴻毛輕北邙山下土寂寞葬劉伶劉伶化槁壤後世傳其名何不釀清泉樽與北海傾陶然成一醉千載方復醒

○登岱

少小尙奇古平生足勞憊逢山耻不登遇石輒思拜南瞻未遊湘北上欲觀岱輕舠初涉濟彷彿見橫黛空天

插虛屏倒影入茫昧籃輿試窮援漸始近襟帶猱猱二壯夫喘汗相負戴腰縫虎皮絛雙屨巨若箕軟兜疑無底屈曲令我載乍上梯級平不知遄行快朝雲覆其巔宛宛狀芝蓋斯須從風揚瓔珞垂變態奇松莫紀數黑石陰可誡夾道如爭趣老筆難盡繪崖空孤養性谷靜鹿遠害蒙茸結橡栗雜亂生菅蒯荒荒御帳坪一室極深邃五松曾彌尊冠劍聳若對其封自秦時其蔭累百代有僧棲其間石佛貌酷類指示藏經峪梵字若拳大相傳玄奘師經濕於此曬次上黃峴峰崩劣尤可愛大

塊噫氣出彌空作竿籟到此飛鳥絕恐遭罡風壞惟餘
千雲馳列陣決勝敗勝者爲車輪負者碎稊稗相牽歸
真源塊軋出靈瀨入雲如踏絮柔弱總無礙得雲可緘
封持作高士精但苦雲味薄不堪當酒賣差忻雲意煖
近體如灼艾雲來根淋漓雲去脚奄靄密甚行復踈漏
日曝我背透迤十八盤心目轉况瘁新盤徑偈仄舊盤
石狼狽常懷顛蹶憂失足落天外獼猴雖能懸萬臂猶
短袂澗深不可飲縱飲豈得再五步一憇停恟况疑有
待夸父或善奔到此心亦戒燭龍所不照何物發光怪

疑是封禪書泥金跡仍在此物暴秦遺何須秘金匱升
巔日云晚啓廟霧已晦燃松照摩崖字畫彎若蠶人往
筆力存餘勇尙可丐玉女坐上頭虛無響環珮千年金
爐香匪直社鼓賽何因炳靈公拱手讓此位神貺每萬
億天府儲作稅神力不可思精誠動闡闡半夜萬衆登
魚貫非一隊燐燐列炬光裏裏晶蛇蛻是時天宇澄燦
見海影碎陽烏浴地底迸出火千派迅速驚輪升羲和
不能帥羣鷄遂爭鳴蛟蜃各醒寐吁嗟寰區小豈但齊
魯隘瀕洞此乾坤江河一溝澮方知大造力適與地靈

會至聖之所臨無能一詞贅杜陵詩絕妙向平計始遂
惜余難久留正復嬰世械徒聞石室勝遙覽松竹翠惆
悵別丈人餘情尙滂沛塵勞幾時息休暇天所賚闔闔
倘可通吾將從此邁

田家偶坐

皇天久不雨雨後復快晴未雨土地乾雨過百草青愛
此喬木枝合抱何亭亭下爲亂石疊上有寒螿鳴我來
久坐卧日晚猶憇停相將問農叟叟言良可聽稚子善
牧牛老農亦善耕每於夕陽外荷鋤時獨行歸來綠陰
下濁酒還細傾不知紈袴子何事長營營

夏日雜咏

高樓多月色卑屋積露華夜靜鳥不語飛蟲如亂沙風
從西北來吹我木槿花此花宜映月爛然成片霞衆卉
何所思含英不揚葩芬芳戀彼姝傷哉遠辭家無因寄
尺素仰觀星漢槎

仙霞嶺

仙霞原非高衆嶺會成勢大楓已斲絕到此猶下視閩
疆天所闢崗巒互鱗次嵌空得屏風與浙判爲二離離

青雲表星宿近欲墜石上露更濃去天里可計三關絕
奇險無乃六丁置封以一丸泥萬夫莫窺伺其傍有奔
澗亂波聲若駛其下千丈崖石尖皆仰刺吁嗟行旅人
失足蓋有自苦被微名牽爭來葬於是叢生多苦竹笋
籜密如蝟輿夫慕陰涼遙指云可憇貪泉不敢酌美茗
無由致但愛腋間風盛夏猶戰悸生平耽丘壑及此慕
平地脫身顛蹙中攬勝乃餘事啾啾越鳥噪落日掛山
背欲問今宵程前峯鎖蒼翠

懷友人詩

迢迢帝都遠促促白日短但見故人去何日故人返與
君長相憶春事忽已晚故園枝上花故園屋上鴉鴉啼
花又落故人不歸家

雁浦吟

清溪憶夢遊雁浦帶漁舟明月波千頃能教旅客愁浦
深鳴雁咽風起漁歌歇敲竹發猿聲關山度秋月人間
秋夜長天際北風涼擊柝誰家子披衣犯雪霜雪霜人
輒軻村閉城門鎖雁浦絕呼聲高樓夜燈火寥落一潭
星陂田鬼火青不知憐子夜猶唱雨淋鈴

庚申春日記所見

江南何其悲草木不容長萌芽纔發生已爲飢民饗無
食思播遷無廬何偃仰強半枯瘠兒形骸肖魍魎久餓
腸已摧兼絕饘粥想終填涸鮒轍豈受江湖養漸漸二
麥秀今歲庶豐穰存者或得餐死者魂已往如何催科
吏程限不暫爽鞭撻鳩鵠民驅令供軍餉徒有骸骨存
安能事耕紡苦役彌乾坤蒸黎在羅網反羨死者安無
膚受笞杖我爲饑寒驅終朝逐塵埃騎驢蹴骷髏三三
更兩兩低眉不忍觀汗出覺盈顙彼孰無妻孥誰來送

楮錘遭逢大洗滌樂土逝安放身與粒食違因知后稷
妄美哉糟糠味其甘若熊掌垂涎蘇武擅庶與妻兒享
荒原萬鬼哭落日衆山響猶有劫餘人含冤述惆悵

燕臺感事

天街何慘慘出師在今朝大旆列馬前弓箭各在腰關
東少年子俠氣干雲霄含笈別所親提戈去征苗封侯
意中事寧憚歸期遙惟有戍婦悲黯黯紅淚飄雖成壯
夫名空負蛾眉嬌傍觀亦嗟嘆日落風蕭條况我羈旅
身安能不魂銷

建德縣記遊和馬蘄原

建德千萬峯勢從六丁鑿奔馬不及旋怒龍交相攫平
壤無一頃孤城此樓托閭井森可圖芙蓉瘦如削西南
何所屈饒歛兩相錯眼前吳山窮望外楚水落不知何
年樹剝蝕類鹿角下有無底潭上有獨立鶴縣小門晝
扃田高水先涸灣環邑外濠密竹隕萬籜陂陀猛虎藏
有時步空郭見慣每不懼輕之比猿獍兒童負米迴與
虎相唯諾如何行旅人到此尙驚愕我徒行迅速未暇
窮丘壑但覩粘天雲恍畏風雨作舉棹溪已斷迎帆樹

猶幕翻疑下巖灘又似走劍閣遠嘯青頗舒近壁黑轉
惡荆關善圖繪深恐筆力弱何須武陵源始極山木樂
翩翩馬少遊其志在五嶽爲吏正奔忙逢奇必酬酢茲
遊恐不再吟咏勉探索他日滯黔雲何由慰漂泊

雜擬

冬日衆卉瘁塞外西風飄哀彼嶺上霜凍此牆下苔征
人未云返陰山寇仍驕漢月在玉門望之千里遙疇昔
家信至八口同枯焦園葵竟就荒幼子傭爲樵我今廢
耕耘何以有黍苗

感遇五首

永日不易暮匡坐難爲歡悠悠念所思頓起愁萬端我
愁其如何今古一浩歎桃李當暮春容華若沃丹方其
芬馥時不謂遭摧殘所以古君子保身良獨難

我行康莊路騁望黃河濤投轡酒肆間引杯酌春醪借
問此何地云是天津橋橋南舊酒樓李白曾遊遨白壁
買皓齒黃金酬細腰大醉數千日天子不敢招人同黃
鶴迴心與孤雲遙放浪天地間浩歌聲蕭蕭太息此人
去千載猿狖嗥

中山沽酒家解造千日酒一醉忽三年形化骨將朽俄
從墓底活高唱驚泉阜啓棺復爲人顏色變衰醜還家
問兒童頃者太平否不芟庭下草又長門前柳如此醉
幾回安得不皓首

束髮仗雄劍孤身事西戎春騎汗血馬秋射烏號弓大
將懸白旗西當落照紅軍聲振邊隅殺氣隨長虹後勁
發一箭前軍穿兩熊鐵甲帶腥來黃榆邊塞空壯士三
十萬誰能與爭功嫖姚旣云歿飛將亦已終邊城事休
矣戰馬徒嘶風

交疏結綺戶簾捲珊瑚鈎銀床動流蘇珀枕設畫樓此
樓何寂寞永閉三千秋美人不復來王孫去悠悠暮雨
散飛棟朝雲停遠洲行樂事已矣空悲大刀頭

紀遊篇

憶昔與吾友相訂黔中遊

丙寅歲秋金陵馬蘅原赴任黔中約余偕往

挂帆

金陵渚欲探瀟湘秋中夜過采石江濤噴雪流月明青
蓮下彷彿騎蛟虬蟻磯復弔古撫迹懷孫劉英雄氣槩
盡小妹煙鬟收茲路入九華池陽山更幽訪舊建德縣
衆峯遮我留快哉蒲帆駛已抵西江頭隔岸皖子城黃

魚大如舟故人擊鮮鱸痛飲不論甌下箸但食腴既飽
仍未休却過彭澤間小孤峙中洲神鴉接飯舞風掣旛
颺颺陶令不可見依依五柳柔遂登石鐘山勢挾匡廬
浮守風湖口關熟狎潯陽鷗彭蠡過眼盡青衫問江州
是時月正圓溢浦波悠悠有聲咽如訴疑是琵琶愁赤
壁石垠露三江煙浪稠相傳公瑾輩於此橫戈矛夏口
望武昌巍峩黃鶴樓一旬登眺遍七澤峯巒道道聞黔
中苦我行遂止楚爲謝宦遊人淒涼別南浦主人何依
依僮僕面如土舍舟憇茅菴佛火伴獨語

至漢口蘅原不果偕行送

之登小舟余留寓長生佛舍

漢陽晴川樓瀟洒十日雨欲弔禰正平

何洲號鸚鵡故人有龔遂

謂龔千谷觀察

遣吏餽酒脯解橐贖

我行遙發武昌府兼程至孝感水遠山重阻奇峯戴車
轍屈曲焉可數黃桑葉亂飛葢石宛成虎我馬驚且疑
不敢穿徑塢間關巴子店望入信陽堡寒林夾交衢夕
照返環堵行地得稍平風天吼何怒輪茵作愁霖白日
匿不吐確山至鄆城顛蹶日四五竟日洪濤中乾衣無
半縷衝泥到臨潁城角已三鼓逆旅何蕭條惟見蝙蝠
舞燎衣向頽竈麥飯不得煮忍饑走長林野棗持作舖

明晨得西風霽景耀眉宇解鞍陳留縣倉卒煩地主秣
馬脂其車吹笙復鳴鼓十月抵汴京繁吹二臺古登高
眺梁宋平壤蔽榛莽傷哉信陵君好士竟何補侯嬴及
朱亥慷慨今存否却過陳橋門酌酒弔藝祖如何北轍
後此國羞用武驅車涉河梁封丘古戰場地遠草色白
天清河影黃大伾北拱峙濬滑東分張淇泉衛境盡地
春見太行我臨銅雀臺遲迴眺清漳奸雄去已久鄴都
丘墓荒西陵罷歌吹灑泣分餘香嗚呼灰生地壯士皆
悲涼疾馳赴趙境爲問邯鄲倡繁華歇紅粉夢寐昏黃

梁倚徙登叢臺風急天雨霜慟哭廉將軍古墳在路傍
咫尺蘭生里兩賢適相當友道今已衰憮然動我腸問
答未及已村人說馮唐蘭生里廉公墓馮唐
故居皆相去不數里回首豫讓
橋令人思趙襄誰能敬義士縱使斬我裳驅車舍之去
竟日如有忘武安屋瓦在邢臺松柏蒼古來紛爭地月
白沙茫茫上谷至帝京朔風人面迎易水寒指髮蘆溝
晨見星我實僕馬痛晚憇長安城長安足故舊祿米分
斗升豈無故園酒沈憂只細傾蕭寺遇除夕年光判丙
丁仰見斗柄寅歛然欲求名三春閉佛舍苦吟如凍蠅

盛夏感亢旱熱寒忽交并有如維摩室兀坐空世情流
光幾何時蟋蟀戶下鳴玉露溥庭梧涼蟾光碎零文戰
俄敗北敝裘實伶俜同輩顧我笑彼實軒蓋輕搖落丹
桂枝悽慘黃菊英不待杜宇喚緬然懷去程曾點在潞

河曾道扶戶部
時管通州倉

空囊代經營柑酒竟坐設雙螯爲余擎

壤署屋無瓦通宵風吼聲此州戊巳際阨會鰲柱崩塵
坳尙不息觸物感徒增迺驅邯鄲驢送我涿鹿亭出都
漫草草斜日空晶晶僕夫問安之日向齊魯行我懷岱
宗高三過不暇登今當遂所願飄忽東南征十日到奉

符喜覩嶽色晴別駕知我至

謂濟南周燕客三府

腰輿命相承足

趾漸覺高山從太虛生半上二十里雲已居下層薄暮

宿絕巘罡風夜稜稜欲觀唐朝跡燃徹摩崖燈側見星

斗大銀河頭上橫遐哉秦帝碑無字蘚苔平照耀丈人

峯孤勢突兀撐大夫拜其下似怯風雨驚霏微白雲洞

荒忽御帳坪懸空下瀑布灘澁珠泠泠焚香拜元君倦

則卧外庭羆虎不敢入無煩夜戶扃海國鷄未唱扶桑

半輪明下岱逢趙叟

昆陵趙旦心秀才時在燕客署中

快然盡一斗相

持吐離奇自卯忽及酉看山席未煖駕言之曲阜亂山

穿夕陽又過汝河口佳哉夫子林地脉一何厚龜蒙夾

日月洙泗環左右周公之東封遜避不敢有留作至聖

墳遂與天地久入廟見古檜果植先師手其文常左轉

其榦如蹲紐唐槐及漢柏合抱十八九萬古生氣存六

經其不朽奉使卞大夫一見稱故友相携樂泮水飲我

十日酒因交素王孫假館近文藪人生遠遊跡歷歷夫

豈偶二年經六省芒鞋耐趨走焉能滯一隅吟嘯此株

守思尋終南桂擬折羅浮柳稍俟我馬肥仍迴向平首

至魯日憫旱

在溪齋集 卷一
東北有奇雲連天蔽朝旭婦子相懽忻可望雨意足一
雨薺麥甦再雨禾豆熟驚塵息飛揚桑柘變濃綠須臾
雲歛盡陽光倍炎燠入夜看衆星皎皎如燈燭天意不
可知蛟龍在空谷

遣興

皎皎中天月清光竟宵晨所照有萬族悲歡各殊倫東
樓富家姝琴瑟締新姻笑裁鴛鴦被寶簾爲郎陳焉知
西隣婦擣衣長苦辛

覽史四首

吳王據震澤意氣何雄哉三千魚腸劍勢抉浮雲開一
戰鞭楚屍再戰傾越臺西施終夜舞影落魚龍猜尙力
不尙仁一朝姑蘇摧空留千年石響屨生莓苔

曹瞞竊漢柄幕府多俊英虎視權與備樓船事東征意
止屬二喬不在土宇平一朝遭火敗遂定三分形螳後
雀已窺典午羽翼成哀哉高貴鄉濺血在闕廷歲月苦
無多搖落秋草并徒然青史上留此篡臣名

漢代有卜式家業累萬千慷慨不自惜願以輸助邊天
子欲拜爵逡巡不敢前當其謙退時義風海內傳一朝

擊南越仍求將樓船遂膺通侯秩甲第何巍然遐哉此
風烈足以起後賢柰何青雲士不思積金錢老死白屋
下哀哉書數編

王敦反石頭獨名郭璞筮璞云往武昌壽命不可恃敦
乃作色言公壽復有幾談笑謂明公命盡今日耳本是
神仙人何妨偶然死愚哉王處仲豈識微妙指舉事終
無成徒殺天下士向使赦郭生其言不驗矣千古妄男
兒無謀類如此

感題寓室

荒荒蕭寺中風景日頽敗流寓多俗夫名流不復會既
無詩酒客亦不來車蓋惟有荷擔翁披褐日中曬涼秋
八九月泥濘車轍礙躑躅聊出門所叩俱不在有時強
受刺十日不答拜或賁空谷音相看但愁態上言年歲
儉下言生事壞客至不能款况復贖與餽一揖去我堂
音問從此邁我如居深山又似竄荒塞天寒尙絺綌蔽
肘一短袂誰憐絕炊烟漸欲色如菜憶昔初來遊繁盛
方絕代羣賢競賓主卜夜歡屢再曾未二十年交遊匪
前輩却後數寒暑當復更衰憊昔日萬金商今朝街頭

在溪齋集 卷一
三
丐靜求炎涼理使我出涕淚

杜鵑花

吾聞昔望帝托國在西川化作杜鵑鳥至今使人憐四
月五月時血淚何漣漣酒樹花盡赤花亦名杜鵑不知
誠有否想像理或然萬物俱有死惟恨長綿綿半托禽
鳥身半在卉木邊卉發以告地鳥鳴乃訴天自從周秦
來失國者萬千望帝有何恨血色久愈鮮劉禪身面縛
孟昶祚早遷不認二主魄亦化爲杜鵑我傷杜鵑花帶
血更媚妍自慚失國故不敢居春前百鳥懷主恩代哺

臣節堅嗟爾花獨苦不秉百卉權舉酒聊酌汝花神庶
歆焉

虞美人草

項王力拔山一歎事便了如何虞美人猶得化爲草草
弱不禁風花如濺血紅柔姿與烈性彷彿在其中君王
不渡江花却江東有試問八千兵能如此花否區區一
美人千古作花神叢生滿漢地漢王不敢嗔每逢春夏
交此花開獨晚留取報恩心欲將春色挽

登虞山

石澗齋集 卷一
虞山石寵窓拂水居上頭每當南風起噴瀑成迴流颯
如錢塘潮萬馬橫戈矛倒濺過樹頂奔騰雷雨浮下臨
千尺崖怪怒堆蛟虬劍門轟其左石色何黝黝蘚苔紛
青黃洞壑如雕鏤一步一異境峨眉無此幽如何近人
區得此物外遊俄登最高峯雲海豁我眸東西二尙湖
勺水不盈甌黑子數點動微茫辨漁舟空外接灝氣涼
風覺蕭颼俯仰弔虞仲憑欄呼子游惜乎人已往遺跡
今徒留我欲航溟渤因之赴揚州西日惜不貸南枝歸
鳥愁何當長風舉直到崑崙丘

擬杜工部前出塞九首

去國何脉脉遠行復悠悠擐甲遼海上鳴鞭黑山頭天
家事征伐壯士當分憂今朝百夫長明日萬戶侯
出身本田廬初試着戰袍驅馬上雪山意氣自覺豪夜
坐聽刁斗晨興望旌旄行者數萬人不是我獨勞
閭里一遠別音書永相乖骨肉關休戚寧不縈我懷兵
凶戰危地婦子安得偕譬彼孤征鵠有時離匹儕
從征只孤身何以能自雄跨我千里駒腰懸五石弓丈
夫各有膽不須憚臨戎嫖姚亦我輩燕然已銘功

行軍貴多謀神武不在戰所從將帥賢士馬盡肥健一
朝破強敵四座俱懽晏我雖在偏裨安得久貧賤
平沙列正陣山險伏奇兵首尾互相救軍爲却月形戲
抽金銳箭夜射旄頭星誤落雙黑鵬更使觀者驚
家書昨日來仍寄邊衣至上有平安語下有加餐字我
身始立功我里幸無事報主情愈堅開邊敢辭悴
同仇異苦樂勝負難預期豈無捐生士馬革甘裹尸勤
王激忠憤非爲恤其私耿耿千載後竹帛垂聲施
轉戰清大漠旋師奏饒歌我行在壯年及歸鬢已皤頽

爵雖有命謙退良足多拂衣謝茅土散髮娛巖阿

觀鷹

山林有鷹鷂飛鳴自擇肉何年遭羅網鷲性受拘束雖
居臂韉上傑氣猶蕭蕭側身望青霄獨立拳一足平原
值秋爽百里無草木高岡雖嶙峋雉兔俱在日壯夫擊
奇毛曠野恣馳逐小能擊鴟鳶大則擒鴈鶩驚飛雖欲
避利爪已在腹巨禽力相當墜地猶反覆終焉殲厥身
毛血灑林麓似此駿健姿何殊賁與育魯人善獵較千
載循舊俗吾亦喜從禽及茲命僮僕非關恣貪饕所愛

往漢齋集 卷一 五
彼神速相彼鷹與禽同爲卵中育如何歛搏噬似欲滅
其族物盛固相戕虎亦食麋鹿譬彼百草腓焉能免樵
牧鷹飢飽則已戢翅安樸邀人乃甚於斯得隴必望蜀
州名詩
往歲滯楚荆浮家木蘭船今茲寄東兗思種汶陽田關
梁疲行役未暇謀息肩愁來豫章吟發音自冷然嘉彼
青雲士逢時早騰騫車騎雍且都觀者塞道邊吾亦冀
特達歲序忽已遷時來姑徐俟窮達諒在天古今揚名
者何必盡少年

落星

夏夜多流星其光下燭地散亂牛斗間不知何精氣尾
芒皆曳線長短非一致屈曲或如龍蓬勃更疑簪其來
初無根其去一何駛白痕留青天良久猶未晦若云非
是星甚與星體似若云真是星列宿俱在位璇璣所圖
形終古不失墜雖精占驗家孰能察識是吾聞星之隕
纍纍在人世重者數百斤斤斧不能碎當其乍隕時鷄
犬盡鳴吠或爲狗頭形或似斧與鑕種種不同式歷歷
各異類初下朱火燃投水水亦沸擲地禾黍焦着樹鳥

雀斃及其化石久人亦不珍貴風雨苔駁蝕牛羊角磨
礪既非玩弄資又難琢成器頑然輪菌軀遂爲世所棄
焉念在天時曾同日月繫日月無變遷星辰有凋弊龍
顏雙角折虎死二目閉嗟嗟物廢興千古同一喟五石
隕宋國春秋書爲異唐時散如雪却在御園內宋末闖
中天一墮海之際不知厥因繇欲問羲和氏羲和顧我
笑口噤不能對聊爲落星吟呵壁以自戲

咏古

曹瞞吞漢鼎氣勢何雄哉逼帝遷許都羣雄盡崩頽水

師八十萬志欲平江淮孫劉既不屈瑜亮誠奇才赤壁
一火焚殘兵自歸來終成三分勢便起漳河臺妙選鄴
中妓歌舞相徘徊行樂曾幾時分香使人哀篡奪名萬
古史編難可裁徒然西陵下蔚蔚生蒿萊

祀竈

窮居本無神久客亦有竈珠桂常不充往往乏炊爨倏
焉逢臘盡竈以上天告請問余主人何用爲宴勞主人
對竈言實愧無以報朱門日燕賓庖厨特喧鬧魚鱉膾
熊蹯八珍不時造粳香復酒旨屢用荐鼎鉶竈神居其

在溪齋集 卷一 三
間儼然一津要厨人思奏績是祝還是禱黠僕竊鮮腴
亦云求庇憐三更始息作昧爽復來到終歲寒不寒冬
夏釜常潦是以竈有權豈徒尊於奧今茲托傲邸冷淡
實堪誚三旬可九食口腹戒殄暴爾職如閑官爾祀等
荒廟遙歸見上帝問爾何所道爾尤竈中微知帝不爾
召來年主人富爲爾整儀貌裘馬去朝天別具牛酒犒

苦雨吟

曠乾既可憂淫潦亦足苦胡爲新秋天蓄此無窮雨始
從初八早浙浙潤我礎因循竟爲霖倏及十四五涼飈

凄然至奮迅欲奪暑祝融殺其威疑受白帝侮富家撤
冰藕紅蠟光漸吐佳人紈扇停照鏡畫眉嫵寧知客子
身絺綌尙縷縷反畏秋速來衣綻不及補出門動阻水
中街浩如浦牛驢一日間顛蹶莫紀數况乃長征人何
由踐乾土嗟嗟甕牖兒枵腹守環堵灰寒蛙產竈屋漏
魚生釜聒耳惟淙淙主客不得語正晝黑如磐六時廢
巳午有時搔首看簷溜如滴乳謂巳漸細微俄然吼金
鼓縱橫黑蜮跳滅沒商羊舞蟻藏無飽鶴獸伏有飢虎
安得蝮蝮升蔚藍淨天宇出窻覽塵鏡自覺面皮古漂

在溪齋集 卷一
泊一無成棲遲在東魯天公何足怨所媿力不努君看
决明花千載悲杜甫

萬年菜

粵有萬年菜青青布柯條條長似松栢葉大如芭蕉和
似橙齏末置之鼎餽調一葉飽數客其根冬不凋自古
菜根味寒儒與久要不知周顒輩曾否嘗其苗

瀚海得勝石水中丞用韓文公合江亭韻

中丞潤而清來自瀚海左碎玉落九天疑從神仙唾拔
起黑山間超拜翰林佐知非尋常姿無乃帝王貨吾

皇初西征戎輅殷地過輿圖萬里拓羣醜一戰挫泱泱
鏡歌回山谷相響和崑崙崆峒神獻石逾萬箇乾坤含
端倪寶藏豈坎坷此石已觀光雲沙兔長卧嘉名邀王
錫誠足最物課燕石善混珍逢之亦無那磨礱悉成器
受質非頑懦尙方韜其精市肆名廣播吾聞煮白石可
以救饑餓况懷圭璧材識者相慶賀幽然發晶光如燈
燭昏惰注之清泠泉硯南孰爭座應嗤玻璃脆耻學哥
窰破什襲在聖門何由覲塵流

擬古十八首

戚戚抱璞心悠悠白雪吟何惜吟者苦但傷無知音由
來郢人調浩蕩空古今排雲叫閭闔餘響杳難尋高鳥
爲之飛淵魚爲之沉聾者笑啞啞視同啞與啞世事故
如此伯牙空撫琴

虛煙迷深山白露溥修竹茫茫我何思彼美在空谷本
是傾城姿何意遭斥逐自言甘荆布羞炫羅綺服脂粉
棄不施無心理膏沐焉知冰霜質不賞紈袴目窈窕憐
新人別爲貯金屋從他新人笑故人亦不哭織素以終
身休休任榮辱

長安良家子素驕不知兵鮮衣策肥馬挾彈洛陽城宴
安恣豪奢軍籍徒有名一朝邊烽入朝野俱震驚按籍
點征戍辭親雪涕行此輩若腐鼠摧鋒何所能頗牧棄
田野趙括守長平舉錯誤國事功勳何由成

秋風動高樹白露爲清霜野水日以涸關山空渺茫時
序豈不遷蟋蟀已在堂遊子胡不歸寧云無故鄉逆旅
進退難險若阻津梁從陸我馬瘡濟川乏舟航徘徊臨
大路涕淚沾衣裳宋玉何以悲庾信何以傷一身自憔悴
他人豈斷腸

程洪齋集 卷一
媚媚我庭蘭移植當戶牖雙葩吐芬芳餘馥戀衣袖雖
有無鼻人臨風亦三嗅寵之以佳人澆之以醇酎當其
未發時視之若蒿莠春濃讓桃李秋至乃晚秀君子勿
棄遺馨香在人後
晦朔苦無月衆星乃爭輝天漢倬爲章迢迢貫紫微河
邊列羣宿一一吐芒威中有彗孛星垂光一何奇欃槍
與天狼怒角如奮飛轉瞬茲復望冰輪漸當時小星盡
以沒大星化爲稀無論妖與瑞光彩不敢施所以大賢
出羣倫自摧糜

蜉蝣視朝暮亦若度百年蟪蛄歷春秋壽命如彭錢悠
悠龜與鶴不知甲子遷久暫同視息物理均自然賢者
勿笑愚愚者勿羨賢卑者自黃壤高者自碧天遐哉大
鵬舉九萬始息肩寧論蓬蒿下鼓翼有鴟鳶
吾慕古俠士迅疾如風雷飛身仗雙劍高舉越層臺殺
人都市中不見血與骸橫衝百萬軍意若無九垓韓廷
仗刃去易水報讐來落葉夜亂鳴棲鳥爲之哀滅沒矣
其影風舉素帷開坦腹卧故處衣履無纖埃吾欲從汝
遊自恨非仙才世復有公等不平安在哉

君子若騏驎小人如鷹鷂騏驎致千里鷹鷂飽思騫得
新便忘故恩寵反成冤徒然縱一擊所得僅烏鳶秋來
緊絛籠慎勿任自然悲彼汗血駒依依甘負轅芻秣曾
不飽鞭之強欲前弓藏走狗斃千古同一憐

西施沉清江一去竟終古人言嫁少伯此意乃輕侮朝
盟黃池上夕敗胥江滸霸主無遠謀忠臣亦刀俎何關
女戎入亡國在歌舞一死殉夫差誰知貞心苦

太古多奇人補天更射日共工憑一怒頭觸天柱折夸
父亦何爲步道義和疾棄杖化鄧林奇材棟梁出人力

固勝天鬼神爲咋舌鄙此季世民謀身且無術

閑閑二頃田幽幽一畝宮修竹蔭其西瓜圃縈其東中
有高蹈士隱居樂無窮遊思琴書外所夢皆黃農閑來
上高原縱眺萬古空緬懷興亡事兩腋生悲風彼豈忘
世人詎不思立功當代不我識颯然髮如蓬

黃鸝嘯青春白雁橫秋露芙蓉生水中不識寒氷洹萬
物各代謝年華暗催度但知故者新又見新者故今我
忽不樂人言歲將暮名利無所成羈棲在中路

清談旣敗俗朋黨難匡時古來當路子舉動爲人嗤大

道平若砥昧者總莫知時事不可爲退當守茅茨遼東
皂帽風孤哉邈難期嚴陵際隆漢五月理釣絲寧退不
嗜進永爲達者師

南樓何崔巍上有愁思婦十五初結褵二十夫遣戍窈
窕空容華獨宿誰與度東家有醜女通國無人顧夫婿
市井兒終身守蓬戶子女俄盈前隣比亦不妬福命本
自殊孰能知其故

武帝狎曼倩畜之比侏儒曼倩亦狎帝隱語相抑掄執
戟十八年不聞功業殊亦論神仙事無乃爲佞諛當時

將相才罕得全微軀大隱免刑戮誰當及其愚

巫山旣在蜀楚復有高唐雲夢與巫峽相去千里長胡
爲行雲女遠就楚襄王圖霸不得志遊畋卽滯荒徒有
宋玉存悲哉屈原亡瑤姬何所慕枕簟留餘香才士善
托諷勿云理之常

人心大行道世路孟門山方寸不多地兵戈隱其間樽
俎結權會握手出肺肝謂言誓相好可以卒歲寒名利
爭錙銖攘臂起相干不殺亦不止舉族互相殘布弈復
下石機巧仍萬端兼有同患侶不獲同宴安功臣竟菹

醞志士皆悲酸已矣勿復論狂歌行路難

息馬地漢鐘

兗州有銅鐘傳是漢時鑄歲久不發聲寂然荒祠內苔
花蝕追蠡猶帶戰場氣知爲漢家物耻屬吳與魏留供
古關侯遂繫息馬地日月當中天照以勸忠義漢祚四
百年終衰在白帝嗚呼斬蛇劍失之昭烈世髯公獨不
死神力千載畏摩挲此銅鐘令我出涕淚

遣興三首

三月甚宜雨雨少二麥枯四月不宜雨雨多麥又蕪

酌晴雨間何由慰農夫昨者忽暴暑幾欲袒裼呼今朝
天復寒恨不擁紅爐裘葛兩難廢嗟嗟在客途

季秋辭東魯命駕遊楚中楚南風景異不與齊魯同臘
月少冰雪微陰日朦朧山長白草遠水淨寒林空雖云
魚米鄉十室九困窮仕宦猶寂寞况我身飄蓬

屈原滯湘潭李白流夜郎杜甫客巴蜀昌黎到衡陽古
來賢達士遠遊乃其常不覩山川異安能發文章况乃
楚蜀交天地方中央未曾適外國何云關塞長惜哉齒
髮衰安得步履強千秋名勝地望古徒褰裳

山家樂

種茶百餘樹種竹數十畝結廬傍溪壑開門向花柳東
田新秫熟隨意釀春酒豈徒自斟酌還以待親友何用
知陰雨涼風吹戶牖何用知晚晴斜日迸林藪牛羊各
自下月出大如斗掃葉關柴扉扶藜送隣叟山中雖有
虎不致傷鷄狗歲稔俗更淳盜賊亦稀有田家樂此意
耕鑿到白首美彼陶潛詩長吟過申酉

龍溪晴望

澄霽山弄暉排雲故爭秀渟泓龍溪水雪浪溢危溜山

橋一徙倚佳色獻春晝野花無主名艷蝶正奔湊鈎金
齊畫出萬疊峯巒皴如棲武夷間若對閩風岫壑懸新
年青苔錯古時繡鐵壁生丹霞銅坑隱白獸俱非人意
料殆亦天結構蕭爽氣何寒盤錯脉良厚美哉方城險
可以禦兵寇綦布野人居星羅戟門甃桃花新漲足高
壤事耕耨吾亦念田園遙憐故山瘦詩翁饒綺語每與
陶謝闢杳然迷所之歸遵礪樵後

遊平山後洞

仙源在人間顯豁摠易求茲谷窈千仞亘古難窮搜初

遵樵徑微漸得石峪幽欲縋深深底更躡上上頭酷日
在我頂喘汗卒未休俄然入憇息涼飈來修修炬火導
我前燦如衆星球照見古崖壁鐘乳懸纓旒或儻若象
獅或利如戈矛或翔若雁鷺或蟠似蛭蚘或橫迸泥封
挺若竹笋抽或點滴床榻堆若蠟燭油或聚語一堂恍
聞鬼啾啾或相背而馳曠似風馬牛或如衆嬰孩跳跟
爭嬉遊或如一老叟植杖思吟謳或爲珊瑚枝可以掛
釣鈎或爲靈犀角可以鐫觴甌種種不可狀奇氣森蕭
颯惜置幽暗中鬼工徒雕鏤青泥何滑滑步履難久留

常恐樺燭盡更與僕夫謀

暮吟

晚風翛然至江上青霞開隣峯多秀色似爭窺墻來蓬
心棲山阿遠跡屏浮埃歸雲集暮閣碧蘚生崇階池蛙
亂人聽瞑禽投我懷觸物動歸興因之重悠哉

田九峯欲送余至五峯作詩以謝之效昌黎體

容陽古桃源大塊之秘奧茫茫迷津子極夢不能到鄙
夫叩玄關非有素嚮導欣逢騷壇長于此建旌纛壺天
輒相引福地必以告欲令見全牛奚止窺半豹起驟宜

沙渚釋屐平山隩所歷已萬峯盡探藏書窖恣餐白石
秀寧畏青泥淖譬如供海錯既飽仍屢犒重之瑤華章
展轉相慰勞人生遇斯樂一切可憮傲嗟予有他役敬
以歸期報先生曰炎蒸意欲遲我權嚴裝戒軍旅出餞
五峯道盛夏煩移節恐以我爲異人貴相知心何必文
與貌臨行重商量非敢違所好

六月朔日書懷併訊行期於九峯

吳會一飄萍三年寄東魯遠欽田文義策蹇容陽府容
陽遊最好恨不相逢早愛我忘我愚奇文互搜討去則

未忍去留今難再留秋期在息壤候信促行輒感君重
投轄因之更遲發聞有迎鑿信相攜同出峽迎鑿不可
晚客子會當返火雲燒大荒我行豈敢憚山巔更水涘
曉涼行最嘉主唱復客酬寧有寂寞嗟敬煩子來民爲
我戒邠驛何以喻此情桃花水千尺

回至平山作

萬全至平山相距止兩峯因行泥塗裏遂覺雲水重有
騎不可乘負我以健僮躋險雖步澁渺如駕征鴻主人
肩輿來相及磴道中愍我行路勞慰藉何從容自歎久

在洛齋集 卷一
客身何年不飄蓬嚴寒盛夏交烈日雨與風長途誰見
問塊獨塵埃蒙方知愛我者四海一田公

食蓮子

蓮生君子池採摘更鮮美叢芳翠可挹猶見露泥泥未
曾賞蓮花竟已食蓮子物候遞更新歲序一何駛荷衣
掛驢背行役從茲始應憐惜別人苦心亦如此

下樺皮界

昨來燕子陂所歷未覺高清晨驅我馬卽漸登東臯回
首望來徑惟見碧樹梢其下白雲蔽萬家一秋毫陰崖

無人居冷泉生細濤所踏盡泥濘我行無乃勞旭石已
數竿陰風猶怒號俯視衆培塿荒林成蝟毛喘汗方至
頂危哉棲鶴巢側身從此下碎石如攢茅豈惜履底穿
所恃斑杖操失足俄頃間其深匪坑壕古來設天險本
以界夷苗隔絕賓主歡徒令增鬱陶

讀陳書感張麗華

褒姒戲舉火潘妃步步生蓮二主溺艷色宗社遂以捐麗
華善決政當時盡稱賢悲哉景陽井亡國亦蒙冤

讀金石錄感李易安

易安信才女酌茗賭記聞舉梳不得飲一笑濺紅裙布
衣老是鄉風流復何云倘使作妃后亦足傾其君

題季桓子井

我行古城隅云有季孫井此地久荒蕪烟雲與草冷泉
枯石甃在汲者不復縋雖有博古儒徒能指其影伊昔
柄魯時富與周公等甲第極豪侈田園任兼并富貴焉
可常滄桑亦俄頃舞佾舊庭階於今走鼃鼃唯留此井
在名與靈光永豈因羶羊傳寶賴聖言炳掘土得物妖
奸雄宜自省胡爲受女樂翻使齊謀逞遐哉千秋事目

接心已領我欲浚其源愁驚蟄龍醒

古人絕唱不可和

昔賢有傳句浩蕩宗元醇托旨雖淡漠吐詞必清真其
聲如金絲擲地皆韶鈞寂寞千載後誰能究其神齷齪
操觚士動矜佳句新偶拾咳唾餘秘同和氏珍百語或
一得持以詫古人古人如明月今人比青燐古人天際
霞今人水面塵速宜藏爾拙寧使意不伸太白讓崔顥
汝士驚元稹同時尙推服况乃隔千春咄哉雷門下布
鼓何必陳不見西施里至今嗤効顰

止巳日修禊浮香亭

春濃魯城隅
葛柳試新綠
達泉潤厚地
波蕩此一曲
侍御有遺亭
蕭然翳林麓
數株武陵桃
十畝滑川竹
雖無剡溪勝
瀟洒堪縱目
平原携客來
飛蓋相隨屬
環池奏清商
雜坐喧絲肉
幽思互相引
諧笑方角逐
隨宜傍鶯花
憇倦侶
蕉鹿良辰併在茲
飲興殊不俗
山公倒接籬
曾點試春服
寧知習池醉
亦是沂水浴
三春忽已晚
轉盼入炎燠
且盡酩酊歡
歸鞭去何速

登鳧山

夙聞古鳧山
與嶧壯東魯
南郊紆遠轡
遂得披林莽
松檜兩三株
黑石蹲如虎
雖無嶽峯觀
山色猶太古
道士四五人
邀我循廊廡
枯藤縛斷碣
霜葉堆礪戶
當年走羣望
今日棲緇羽
精舍軒其窻
可以望前浦
昏昏暮鴉噪
落日如懸鼓
却背林壑行
迴峯尙堪數

湖上對月飲

天水相與連
東南一峯缺
金蛇鋪素練
明月從此出
鳧鷖宿旣靜
魚跳波亦歇
盡攬水面光
來爲樽中物
嬌歌當清籟
婉轉幽復咽
豈乏靚粧人
芳心素紈質
景麗人

亦佳少年盡怡悅那無酒如澠顧我頭似雪幸有清夜
長不須杯行疾庶比赤壁遊歸來墮山月

秋日枝江觀漲

岷江自西來兩岸山所束懸流數千里吼怒如轉轂方
其清淺時下峽勢已速及茲泉源漲盤轉挾萬谷黃牛
包其巔灑瀕浸過腹蛟鱗削平崖鼉掌轟巨木一夕風
雨來千秋撼坤軸壯哉懷襄形一望宛在目田廬半瀕
洞林陸翻窘縮高樹雖可登巢居難驟卜江漢原朝宗
滄溟納川瀆盈虛固有候巨漲豈久蓄放艇須及時秋

風動黃鵠

秋懷詩八首

荆南百草長盛夏何莽莽叢條蔽白日天地爲不廣一
朝涼風起掃地作秋爽摧殘寒蛸鳴蕭索隕葉響霜露
雖未零炎燠則已在靜言觀我生遲暮發悲愴

空中吐奇雲川澤變陰晦獨立高阜巔我思浩無際踈
風時透腋涼雨從北至江沙噴珠圓野水濯鱗細茫茫
漁舟子泛泛凌灑氣權歌兩三聲沒入滄波內不知林
麓外別自有人世我亦理釣綸聊將從爾逝

芳草如碧絲幽蘭低綠枝正當秋風日是爾斷腸時楚
客去已遠湘靈降無期徒言涉江采馨香誰可貽西山
有薇蕨志士甘若飴秋至薇亦老何由療苦饑

葉間有微生蠕動寡飲啄時來亦羽化羞彼蝟蝟翻
飛不能遠栩栩依草木炫身以文章大塊所雕琢性柰
驕陽蒸不堪霜雨沐衆芳皆辭枝天地亦變肅嗟爾失
所歸焉能待秋菊

晚天虹霓出霽色西南開平岡翠滅沒似是章華臺楚
王多雄風半自高唐來宋玉善諷諫景差多賦才千古

事已往流風成草萊惟餘江關意庾信空悲哀

白露下大空涓涓沾桂叢是花當搖落獨秀陰崖中馨
香飄廣路金粟綻西風借問何能爾托根廣寒宮素娥
之所依不與衆卉同艷色亦後凋奚論柏與松草木有
貴賤誰能問天工

倦翮思奮霄窮鱗懷溯游荒哉天地內吾道常悠悠羈
旅何足樂逝將還舊丘舊丘亦蕭條我志在皇州端居
北窻下大火忽西流擘鏡照華髮逝駒焉可留常恐歲
寒至嚴霜侵我裘富貴兩相失神仙難預謀曲徑生涼

往溪齋集 卷一
莎哀蟲鳴斷標萬彙一蕪沒何分剛與柔所以古之人
悲秋良有由

豪士惟二端讀書與擊劍書能紀成績劍乃生光焰於
茲托性情終古每不厭外此皆長物何關身豐儉彼雄
萬人敵少壯常在念咄嗟歲華晚學之恐無驗絕口不
論兵羞爲平生玷

過漢川縣觀秋漲

大江從西來漢水與之會二川矜波濤拍天乃其勢重
之以秋漲決滂浸平地一望無津涯天吳太專恣鼉鬪

入板屋鷗鷺踞屢肆斥埃水中央亭臺失其位波心有
朱樓木是舊邸第恍若蓬萊山倏忽現鰲背方知滄桑
更祗屬俄頃事翩翩孤帆客隨意泊水次江間值枯柳
繫纜愁遠逝月出風頗平吾聊寄身世

任城南池

任城古南池杜老之所遊今經千餘載樹木何修修蕭
然水一灣曲抱城南陬雖非通衢境可以進小舟牧馬
一時來羣嘶飲清流落葉已鋪徑想聞蟬韻幽昔人駐
高躅終古物色留許簿亦何人附之得千秋池邊有新

堂榱棟逼雲浮豐碑列將滿高宴會王侯似將與杜老
唱和爭先籌爾位豈不高爾詩良足羞罷官一朝去碑
仆名亦休方知不朽者斯道難強求

答吳秋潭小集見投之作時卧病四日方起

先生以詩來我正在病鄉昨夕忽暴下委頓據一床胸
腹相否隔痛若遭鉅鏹氣息奄欲盡出語聲不揚捧箋
再四讀兩眼俱茫茫及其稍平復勉起進勺漿展詩再
吟哦使我意激昂上言師古人夏日宜杜康中言乏珍
具餽何聊相將此語乃過謙盤饌味已芳下言風雨至

客醉猶在堂正籌歸路難籌景俄復涼真率見一時坦
然露中腸求之古人中韓杜堪輩行投我旣瓊玖答者
難成章緬思滯長安實乃名利塲對客無別語所談在
軒裳其有得勢者炎熱不可當倒海爲銅山量沙填太
倉甫聞下綸綍遂思營筐篚如何有閑暇更以風雅商
先生古之儒我亦蓋世狂性皆耽懶癖不副時所望轉
瞬榴火紅倏忽槐花黃君當宰邑去吾亦束遊裝當代
倘見求問余南山陽茲辰安不樂屢宜罄杯觴况今效
田文不必錢滿囊祥麟偶一見威鳳終高翔避世金馬

門斯語甚荒唐詩翁有仙骨聊自慰身強

往深齋詩集卷一終

往深齋詩集卷二

闕里孔翊宸先生鑒定

錫山顧彩天石甫著

傳鐸振路

闕里孔

傳鈇西銘

全選

青陽羅筮豫志行校正

七言古詩

馮小憐

馮小憐馮小憐蠻裝細馬紅絲鞵無愁天子不知苦愛

爾宮中醉時舞鄴城走馬宇文來猶戀龜茲一坏土當年不下晉陽城如今彈作琵琶聲

古園草

古園草根何綠秋風掃地已多時
薜蘿零落莎鷄戾良人不來塵漠漠
倚車而思車折軸安能早取芳菲心托
相思兮望黃鵠

冬夜吟

玉漏沉沉剪秋水風靜沙寒雲暗起
美人簾下一聲簫驚醒垂楊秋不死
素娥懸鏡照相思正是霜華滿地時

醉倚象床千種恨一生惟有月明知
月明移過妝臺畔欲拂芸牋錦零亂
多情已寄八行書猶自千迴夢中喚

蜀王古鏡歌

十二峯頭號杜宇蜀妃此夜停歌舞
憑將玉魄送深山腸斷君王淚如雨
紫珍閉匣菱花秋美人不向鏡中遊
便可沉霾一輪月欲使神光燭九幽
鬮不共蒼苔沒泉底珊珊動香骨
傳粉依然傍鏡臺猶望君王早同穴
竹魘慘切啼清晝天若聞聲亦應瘦
誰携殘月出人間一夜西風斷宮漏

公無渡河

黃河流濁水波蕩龍門山漢武曾聞塞瓠子鯨鯨奔竄
何時閑斬蛟猛士號古冶不窮河源誓不還河伯首戴
金兜鍪雙睛炯炯照素秋黃河三十六萬頃乃是天公
淚經天徹地倒海而東流大禹塗山去不歸九河踪跡
今問誰不見黃昏兩岸月枯楊白骨墳纍纍嗟爾築堤
徒自苦畚鍤冤聲遍河澚誰是揚帆利涉人風沙颺盡
屍歸土我今三唱公無渡公獨徘徊向中路願作滄洲
精衛禽啣取扶桑塞煙霧

望夫山歌

朝望夫暮望夫望夫不歸心欲枯可憐妾心堅似石化
作山頭一峯碧浣紗溪傍有小女隔水多情暫相許生
來不慣望夫愁盡日停針淚如雨

古東門行

出東門暮歸來千村無炊煙惟見蒿與萊落日照城郭
此時不見舊時行樂歌舞臺但聞狐狸嘯我前燕子歸
巢於林木慈鴉暮噪寂寂朱門開故國蕭條竟如此嗟
我婦子何爲牽衣哀丈夫生當立功名不當輕棄七尺

在漢齋集 卷二 三
骸提劍明晨救邊去不封萬戶何時迴婦曰嘻君可棄
妾薄命轉溝壑爭如堂上白髮懷中孩室中更無斗粟
儲架上衣破生青苔君若萬里別妾當化作山下灰丈
夫壯志非不憤安能到此無低徊我歌東門行四座盡
咄哉黃河尙可捧土塞東門淚落難重揮

沙岸行

黃河兩岸飛黃沙黃河千里無人家吳船底重難徑涉
吳牛喘月空成霞水漿濁漉不可飲炎蒸爍人氣欲盡
壺中一半帶沙泥稚子垂頭渴將殞北來行路難如此

估客悲歌淚如水何況從軍到朔邊更向黃沙磧中死
漢軍莫唱丁都護重城蒼蒼風雨暮萬國吹笳虎豹驚
千山落月狐狸卧夢中尙憶還鄉路河水潺湲向人語
撫劍英雄雪滿頭彎弓老將顏如土沙岸瀟瀟作雨聲
夜來陰晦少人行可憐白草黃雲塞偏繫千秋萬古情

神絃四時曲四首

春篁綠遍湘神廟錦瑟無絃響幽草鷓鴣罷語子規停
白紙梨花風裊裊衰燈影落金鳳幙天吳夜教蚪蚪書
門前老魑柳生肘身變旋風花在手

在漢齋集 卷二 四
紫塘幽幽聚螢火神姬時乘晚涼坐羣蛙學拜鼓漁陽
碧草擎來花朵朵路旁石馬汗如漿翁仲解鞍眠石梁
翠裙小姬歸路黑千年一燈黯於漆

枯條吼風如怪虎虬面狸睛現形古據盤飲食人森寒
黃葉團團鬪醜舞河橫月落尙未歸啾啾埜仲羣相隨
隔沙細語采紅荔拾得灰中一雙履

尖風破窻燈自綠長影危冠倚修竹巫澆臘酒急相迎
舌凍歌聲不成曲迴身颯颯簷有沙野巢火起燒慈鴉
緣梯上屋望不見短髮如茅霜一片

戰後行

千山之南萬山左碧草叢生花朵朵危關野戰朝棄屍
澗道陰風夜吹火出穴黑狐吞鬪醜黃蛇直立如奔虬
千年不復有人到血地難耕砂水流兩崖削出城隅勢
十萬羗兵旗倒豎風掣牙幡化白雲秋沉羯鼓悲霜樹
回首平安燧已銷連營吹角夜迢迢英雄老盡長城窟
誰與天家守渭橋每從戰後常經過指點山村淚頻墮
冷落無人塞草腓夕陽西下秋天暮亦有經霜滿地花
飛來蝴蝶憶誰家蒼苔野塚黃昏月不見人煙祇見沙

白雲送客

一片白雲如白衣江頭送客江南歸主人已別客去遠
猶見白雲江上飛主人殷勤意堪戀日暮長亭把樽餞
樽空上馬曾幾時賓主回頭不相見今不相見昨相聚
白雲颯颯墮飛雨燈殘客館夢主人長亭猶致殷勤語

烏棲曲

門前烏欲栖月落夜將半華堂置酒清歌闋紅燭正高
客未散勸君酒君持盃君獨不見長洲苑鷓鴣飛上吳
王臺憶昔西施半醉時清歌急管相徘徊銀壺玉漏頻

相催栖烏滿樹亦驚起不知爾今安在哉

海陽曲

海陽城勢高嵯峨海陽城樓鼓角多城門千仞不可拔
將軍三戰三馮河河深岸濶壯士苦守將身雄氣如虎
朝持蘇武無旄節夜擊李陵不鳴鼓鼓聲入雲雲爲愁
匝月不破三軍羞會須歎血先士卒安得痛飲彈箜篌
軍中婦女不知數紅袖啼痕愁日暮有客能歌馮小憐
無人解唱丁都護援兵路絕餉道空滿城菜色無英雄
圍如月暈繞三匝豎子倉卒真成功吁嗟死守竟何補

往後集 卷二
一旦城傾淚如雨父老皆迎一旅師
髑髏不掩三年土
天長地濶海南道猶望王師終日到
寸心何處托哀衷
惟有離離路傍草

鬼馬行

旋風夜起迴沙舞樹影蒼蒼隔秋浦
此地多年人不行
惟有沙塲鬼私語將軍苦戰成國殤
血手還持竹葉鎗
身騎鬼馬馬無影一嘶萬鬼皆慘傷
當初市駿價百萬
與人一意同患難何期垂老成棄捐
汗血功名灰一旦
老骨如山淚不收敝帷豈蓋鹽車
羞年多物化氣仍在

幻作夢裏真驂騑古祠風雨神燈下
颺颺公然騎石馬
中宵馳騁恣揮鞭却把門前卧碑打
嗚呼死馬蓋有神
况乃生爲正直臣始知千古不降士
定有浩氣千秋旻
雖有浩氣千秋旻公道抑塞何由伸
願騎鬼馬訴天帝
遊遍八極招其魂

石丈人歌

丈人丈人爾誰子翁仲爲名石爲氏
身居隴上懶耕田
家近墓門長不死天寒苔蘚滿身綠
日暮風沙連脚起
不信君爲黃石公猶有兵書藏袖裏

無人

山城落日紅如血
樹杪秋風墮黃葉
熊羆颯來木魅愁
亂石崢嶸似人立
短垣敗甃臨虛墓
蜥蜴溝中吐陰霧
飛猱落樹走空山
風掣鵞鵲眼光怒
孤蓬無根終日遊
寒雲迸出繁星愁
百年茲地絕煙火
寂寞不類中原州
有時夜靜蒼煙布
髑髏相向搖頭舞
草長無復蝴蝶飛
鬼火燒殘原上塚
塚中父老常相語
王師不至更何許
但使原田日黢黢
天下曾無不耕土

古體謠

水之紆風亦徐水之趨風發
虛蕭蕭大樹纍纍丘墟蛟
龍爭戰起於須臾春花萎
折荆棘繁蕪鳳凰巢空鴟梟
踞居千鍾粟不如飯一盂
千金賜不如酒一壺酒纔盡
霜雪改髮鬚富貴能幾時
空山碧水吟樵漁

關山夜雨

迴風夜起沙如雪
都護營前將星滅
半捲黃雲壓帳垂
橫空不見關山月
陰飈颯颯螢亂飛
鴟梟帶雨鳴牙旗
將軍玉帳忽驚起
疑是羗兵夜合圍
控弦壯士三千隊
解甲連營正鼾睡
中軍傳令着鐵衣
雨濕兜鍪冷難戴

君不見戰場白骨如車軸每到天陰聞鬼哭啾啾聲似
向南行燐火青青淡於燭紅粉樓中夢裏人年多應化
馬蹄塵不知今夜瀟瀟雨何處還家說苦辛

遠別離

亡友馬雲翎作也雲翎卒後遺稿刪之余特愛
其命意恍惚出語離奇在可解不可解之間其
太白長吉合而爲一人者乎因畧加竄改留之
集中以見余與雲翎疇昔之交也

遠別離瀟湘浦木蘭舟橫桃葉渡欲晴未晴天半雨欲

陰不陰日將暮野猿下垂飛猱舞蒼梧空煙鷓鴣語荔
枝落蒂從風飄荒草淅瀝窺猛虎送君江南從此去墨
點青山成太古鳳凰翕翼啼我前麒麟折春哀其間悔
陽春之不樂年華逝而不還鄭國芍藥采以贈天天怒
其褻謫之千年此日君去鼉鼉呼煙嗟哉魯陽戈不如
揮折沉虞淵夸父棄杖去不顧回首日出扶桑邊我獨
與君隔江南之長川兩相望而離天關傾愁瀉作海水
流潺湲

長相思

長相思在江南朔雲黃葉渺無際積雪萬丈瀾層嵐美人悠悠書素絕日暮空閨淚如雪寧將雙杵擣空砧不忍孤幃弄寒月寒月漠漠秋煙長夢中有人歸故鄉歸故鄉拭清淚火添秦篝香蕤被大男嬌呼小女啼起來推幔聽鳴鷄那知仍是異鄉夢驚魂恍惚迷東西長相思空悲悽

白頭婦

白頭村婦五十餘半間茅屋臨長渠晨興紡績不停手薄暮惆悵倚門閭自言少小良家女嫁作河東戍人婦

夫年二十戍邊城戰血化爲原上土阿夫去時兒僅週遶身覓乳啼啾啾今年三十能服賈離孫棄婦長操舟夫亡兒去身老病婦少孫孤誰托命出門終日望兒歸惟見白雲飛掩映瀟瀟風雨柴門黑屋漏衾寒眠不得夜深草穩夢魂痴夢見夫歸兒在側

山鳥

山鳥啼碧雲山花帶香霧春聲如喚人歌斷黃金縷朝遊暮遊驄馬郎欲歸未歸河上女盈盈兩相隔翩翩翠袖舉杜鵑花開幾許百囀鶯時時語晚妝樓外響芭蕉

往來齋集 卷二
一夜瀟瀟寒食雨

干將莫邪

干將莫邪乃是吳國之猛士楚國之良工楚王召使鑄劍採盡六州之鐵三山之銅煅煉日精火鼓盪闔闔風煉之十載晝夜不暫息開鑪乃見雙青釭心知楚王不識寶但獻一劍一劍藏在南山中下鎮盤石上古松人有盜劍者碧焰飛出光矐矐楚王冠帶坐受朝章華宮干將莫邪捧劍膝行入王命取劍觀其鋒王曰嘻寡人使汝鑄雙劍汝何獻雌藏其雄叱令揮劍立斬之須臾

血染蓮花紅干將莫邪怨氣上徹於蒼穹血面訴天帝帝憐其枉加重封有兒八歲身如熊眉間廣尺音洪鐘上山縛虎豹下海擒蛟龍枕戈嘗膽思報怨但恨無由得近君王躬王夢一兒眉間尺挾劍直入堪其胸自言我乃干將莫邪子王冤殺我父願得王首酬吾翁夜寢驚起心怔忡購得此兒首官拜令尹糝千鍾南山有俠客家住商於東手持雄劍來會干將莫邪子此汝父所鑄吾今掘得加磨礪但聞楚王購汝首我欲往見不得汝首無由通可憐干將莫邪兒仰天太息而自剄持頭

付客餘氣亘日爲長虹客言此行不負子屍方僵卧塵埃中客來見楚王敬獻壯士首楚王召客入捧頭長跪加函籠王前看兒目眦裂頭髮上指何蓬蓬羽林衛士盡駭嘆六宮粉黛咸悲恫王呼殿前士速置大鐵鑊煮兒之頭烹兒腦使兒骨肉俱銷鎔兒頭三日煮不爛鑊中躍起聲隆隆客言此乃壯士首王前臨視方銷鎔客因拔劍擬王頭王頭已斷客亦自刎而相從須臾三首盡糜爛楚人不能辨分葬三塚成三峯至今名爲三王墓風雨鬼嘯荆榛叢吁嗟此事出何史怪幻不可信但有俠氣傳無窮乃知古來壯士有如此荆軻豫讓刺人不死何以稱英雄

此日足可惜

此日足可惜此景不得留何事我二三子不知行樂但知鬱鬱長悲秋富貴一敝屣功名一虛舟使我有身後名者不如生前一樽酒快意而綢繆况乃金陵六朝之餘迹處處多酒樓吳鹽堆盤啖嘉果桑落破甕開新篘引長劍聽吳謳座中有客善歌舞邯鄲少年狐白裘論慷慨談風流一語不合意瞋目橫戈矛飲闌開窻眺千

在漢齋集 卷二 三
里惟見天空鷺下江楓葉落聲蕭颼噫此日不樂吾與
爾復何求君不聞平羌烽火急荷戈軍士無時休又不
聞黃河北年年饑饉蒼生憂存者鳩形鵠面不滿百死
者積骨高於丘此曹求活尙不得何論熟醉爲身謀此
日足可惜身外焉足籌曷不呼李白劉伶輩奏之天子
封以雲溪侯吾將傾橐底以供俠彈與擊毬吾將典鷓
鷃以爲佳人索笑之纏頭蠻觸爭雄如夢裏兀然爛醉
消閒愁

快哉行

快莫快兮乘濤放棹入具區網取三尺銀鱗魚快莫快
兮赤脚手提瓦酒壺上山看瀑如濺珠歸來山房酌餘
酒大星當窓如撒豆秋風夜響動四山老魑木客皆吾
友沉酣大睡枕酒瓶兀然千載還復醒

浩歌行

江南地冷梧桐凋鳳凰不食聲嗷嗷山鷄野雉啄蝼蟻
枳棘隨分能安巢珍禽耿介擇棲止營營羞與青蠅齒
先生七尺軀亦然遭世不諧寧餓死君不見梁鴻臯廡
下君不見盧仝洛城裏賃春豈得誇高名破屋何人識

奇士我曹意氣徒干虹到處踟躕悲途窮北走幽燕南
走越破簑敗笠當秋風市兒白眼但嗤謂何不長安謁
津要今宵半刺稱門生明日高軒在廊廟兩度驅驢歸
去來我無其命兼無才薦福碑文直百億先生到日遭
轟雷丈夫傲骨不可邇胡菜擲碎當瑤堦世途偪仄苦
復苦爲儒萬不如農賈農賈逢年滿橐金儒生藁項隨
黃土向平非愛浪出遊半爲兒孫作馬牛一朝粗了婚
嫁事五嶽飄然無所求楊朱泣路豈爲達墨子黔突翻
爲羞引杯逆旅清夜酌江月來照明空樓此時忘却天

下事山僧野老皆吾儔但見令人白髮照淥水不聞古
人白骨迴荒丘飲亦不須醉歌亦難成曲有限流光過
隙駒無窮心事南山竹

秋夜雨

西窓一夜涼風急雨脚斜飛度簷隙樹杪黃雲作陣來
昏鴉翅濕難棲息此夜高樓笛罷吹此時孤戍角鳴悲
一聲訴出關山怨十萬征人淚雨揮我欲扁舟涉瓜渚
掛帆宵向金陵浦無端匝月滯延陵蟋蟀竟來床下語
樽空無酒亦不愁囊空無錢祇自羞連宵月好總相負

往涉齋集 卷二
不如風雨聲颼颼捲簾疑在瀟湘裏又與巫山峽中似
青篔細網夢漁翁落葉踈燈泣詩鬼

采蓮曲

采蓮采蓮水中沚桂楫蘭橈秋色裏尋常一樣試明妝
今日妝成偏映水水面荷風暑亦涼藕花深處欲添裳
湘裙濺濕行不得襪底凌波淺淺藏隔浦誰家起樓閣
雨後雙雙捲珠箔樓中長嘯倚欄人道與吳宮景相若
吳宮如今野草秋采蓮不到百花洲徒剩殘荷與衰葦
山姑村女來遨遊歌采蓮歸莫晚紅英落盡綠衣愁夫

塔關河幾時返

悲哉行

男兒二十當成名三十四為公卿如何半百猶未達
白髮種種頭上生我欲上書天帝庭帝閣不納徒涕零
貧賤落魄竟何底仰首浩唱悲哉行悲哉之曲千古奇
太行龍門爭嶮巖孟津波濤極洶湧滄海潮汐翻淋漓
兩輪之車舟一葉不摧卽溺悔何及世間多少富貴兒
朝榮夕瘁同呼吸潘安衛玠如朝霞麗姬毛嬙顏比花
少時灼灼逞風韻一旦皓首成蓬麻漢有五侯唐五王

甲第巍峩互相望當時繁盛冠京邑今日纍纍塋北邙
北邙之墳亦壯麗石槨堂封巨天起子孫去盡樵牧來
誰酌墳前一杯水古來不死誇神仙神仙何如美少年
葛公不返丹井上郭璞已塋金山邊張良去隨赤松子
嚴陵高隱桐江裏千載徒存漢史名欲覓二人今已矣
昔時烟月誇揚州二十四橋皆酒樓杜牧風流曉雲逝
煬帝行宮芳草愁萬事堪悲復堪痛何必邯鄲始爲夢
我見爭名奪利人紛紛過耳蚊虻闕九重賜粟千萬石
不如芒鞋竹杖隨所適大纛擁兵百萬人不如巖栖徒
步終其身君不見鄧通骨相當餓死雖有銅山寧救貧
徑須遨遊五湖濱長與妻子甘隱淪是非得失付天外
窮通壽夭存吾真

擬鮑明遠行路難體五首

四座緘默慎勿言聽我劍歌行路難摧輪豈必孟門道
至險不獨太行山歌鐘在堂棨戟戶平生豪華甲三輔
我無駟馬與高車焉能齟齬學徒步一朝馬病車軸折
令我顛蹙在中路

君有玉盤徑寸之明珠冰紋含霧之鮫綃珀觴蒲萄之

往溪齋集 卷二
美酒黃金錯落之寶刀有歌有舞須及時輕裘肥馬當
自豪一朝金屋成瓦礫但見叅天松栢狐狸嗥嗚呼功
業垂不朽不如生前一杯酒

漢宮三百又六十中有失恩薄命妾君王行幸皆蛾眉
過妾之宮不曾入當時迴扇邀一盼有詔尹邢不相見
華落愛馳曾幾時玉堦履跡青苔遍寧爲苧蘿之匹婦
不願生逢入宮妬

去去復去去馬前隴水東西流窮達有定分焉能鬱鬱
生牢愁功多不欲朝拜官但願生入玉門關天子殿前

佩印易故鄉骨肉相見難相見難一惆悵長城峨峨高
百丈內有烽火通甘泉外有白骨橫榛莽築城之人尙
賜死何況無功被金紫

猛火不燬荆山金利亦不斷長江水貴賤結交無異心
惟有鮑叔與管子張陳因小隙遂成殺身仇朱穆論絕
交劉公效其尤勢利而結納千古稱貽羞幾見嚴陵及
光武布衣天子俱千秋如今世路險且仄縱有膠漆將
焉投

巫山高

巫山高巫峽深上有層巒疊嶂之嗟峨下有鮫宮龍窟
之幽沉高唐乃在雲夢間望之知隔幾萬山襄王世俗
之庸主神女何緣與在還朝雲朝復朝暮雨暮復暮雨
雨雲雲無定期朝朝暮暮還如故屈原好直諫宋玉多
微詞借此以諷主豈曾真與瑤姬私後人不察賢者意
對景妄作荒淫思巫山神女倘猶在胡不遣風伯雨師
下擊之巫山高使我悲

古鴈門太守行

鴈門太守李飛將萬里邊廷獨乘障夜擁彫戈皓月中

晨驅戰馬秋雲上戰馬蕭蕭啣勒環紅旌直指祁連山
山頭却望尋源使草滿崑崙獨未還綠河水冷胭脂滅
壯士無窮盡埋骨至今猶笑丁靈王魂夢不曾思漢月

白苧歌

吳中白苧白如水裁爲遠衣寄千里美人刀尺慙經營
惟恐君心不歡喜東飛燕子西伯勞與君隔絕長江濤
兩心安得合爲一夜見君歸朝不出朝不出兮夜同寢
錦爲衾兮角爲枕白門楊柳枝上烏啼時合歡夢未甦
夢回巖城起譙鼓燈花亂炮如紅雨人生有此歡百年

往來齋集 卷二
願着白苧爲君舞

明河篇

老碧凝秋露痕
泣層霄界破玻璃片
誰教千里注銀濤
牛女相看不相見
黃河古源從此瀉
宿海崑崙在其下
是爲神水能飛空
凡水皆從地行者
繁星亂浸如白土
河車不行歇河鼓
直是天公缺陷愁
無由再喚媧皇補
時時北斗如遙挹
帝醉瓊漿不曾吸
終年汎濫天市垣
惟有牽牛身不濕
牛郎鰥處顏色老
驅牛河畔斫青草
詎知牛智鵲不如鵲
能成梁牛拽倒鵲頭鵲
尾相啣處

億萬填成一絲路
可憐郎瘦女腰纖
極望何人見
曾渡乘槎謾說張騫事
應是張騫欺漢帝
人天遙隔兩茫茫
落盡紅樓古今淚

襄陽曲

襄陽城邊大堤側
終古何曾斷行客
商人桂棹木蘭舟
公子花驄寶珠勒
大堤南邊多酒樓
珠簾半捲珊瑚鈎
佳人日日凝眸望
年少朝朝挾彈遊
春日襄陽酒初熟
當壚小妓能留宿
月高北院尙聞箏
花發南樓爭度曲
一擲樗蒲百萬錢
如澠美酒斗十千
欲邀燕市悲歌士

行海齋集 卷二
同上襄王玳瑁筵步幃重重錦茵亞曲房列坐揮金竿
但覺烏啼翡翠簷不知日上鴛鴦瓦十二紅樓競艷妝
流波媚客斷人腸東家賣盡千金駿西舍輸完百寶裝
轉眼豪華變蕭索多情猶被烟花縛身滯天涯久不歸
狂花漂絮終焉托勸君莫作荊州商勸君莫戀揚州娼
荊州雖好難久住揚州煙月令人傷馬上誰歌大堤曲
歡娛未幾悲相續水色山光似有情歌臺舞榭非爲福
兀兀羊公墮淚碑年年能使路人悲不知此地繁華景
可似羊公初鎮時

夜行曲

寒沙不飛秋月白百年老鴉叫荆棘陰風簌簌驢背來
催趲行人入昏黑路旁山鬼持炬燈照人不自照明
猙獰羣影立相攫乃是怪樹與古藤路遙路近安可測
木魅山魘盡欺客此時茅店與荒邨杳若蓬萊尋不得
人生總在大塊裏行住坐卧一致爾如何羈旅便生愁
更值夜行望休止君不見俠客弄丸光閃閃所到妖魘
驚破膽

採茶歌

採茶去去入雲山最深處年年常作採茶人飛蓬雙髻
衣襪襍採茶歸去不自嘗婦姑烘焙終朝忙須臾盛得
香滿筐誰其販者湖南商好茶到得朱門裏淪以清泉
香味美此時誰念採茶人曾向深山憔悴死採茶復採
茶不如去採花賣花雖得青錢少插向鬟邊使人好

杜宇行

時有土司自訴失國者作此詩之

有鳥有鳥名杜宇云是蜀中之舊主聲聲似喚不如歸
借問君歸向何處嗚呼社稷輕鴻毛劉禪孟昶皆爾曹
他人失國竟泯泯爾何羽化猶嗷嗷如今車書大一統

爾雖歸蜀誰尊奉百舌過時尙不啼勸君緘口安卑樓

秋雨歎

秋雨秋雨復秋雨一月不晴何太苦盡將江海水上天
不遣蛟龍歸洞府有時日出雲漸迴樹頭颯颯清風來
居人翹首望晴霽謂是古時天眼開須臾四面陰霾作
雨更滂沱風更惡濕窓紙破屋茅漏樹葉亂鳴轉蕭索
東隣昨夜崩墻堵西家又歎無炊釜城中斗粟亦難求
郭外何由刈禾黍七月不應便苦寒雨多自覺衣衾單
誰能登天塞天漏吾願酌之以樽酒

五色詩

流霞亘天如散綺武陵桃花一千里驪山炬火笑霜楓
十二櫻唇絳紗裏洞庭連空九疑高柳津初上征人袍
平疇麥浪阮公眼暮天雨過柴家窰仙人籜冠柘爲服
菊英綻金桂零粟回望中原秋滿林九曲河身倒流濁
蘇卿雪窖髯皤然燕客衣冠易水邊不如擁絮雲堆卧
占種梅花玉作田寒鴉飛盡劫灰舞潑墨濃書漆屏古
燭龍燈暗石成煤北極三更夜風雨

三五七言分咏適怨清和四首

鳶飛天魚躍淵雨過白龍嘶草深黃犢眠瀟湘估客擁
衾醉一任風吹下水船

吳宮幽玉簾愁月缺便逢晦花殘仍遇秋蛾眉失寵更
遭妬老將功多獨不侯

中冷泉無垢天新鑿寒冰潤乍磨明鏡圓黃河水遇聖
明代閨苑風吹兜率仙

搗鸞箏吹鳳笙活火藝沉麝吳鹽調玉羹佳人二八如
酥體春夜洞房初定情

桃源行

後人鼓棹入山谷但見飛流瀑布懸崖牢森森怪石相對立中有萬樹之緋桃春水千迴更百折紅雨亂濺行人袍煙霞羃歷洞門閉欲入無路波滔滔頗怪昔時避秦士何以寂寞成逋迹架巖穿壑建市井耕煙墾霧開平皋參鶴馴猿作鷄犬收獐飼鹿爲豚羔偃松卧石代枕席天漿花露當醇醪有時鸞鳴及鳳語爲奏縹緲之雲璈有時疾雷復迅電爲震激烈之鼓磬其男草衣而木食其婦雨織而風縑旣不爲商山采芝之四皓亦不學扁舟泛海之盧敖曾不記有嬴與漢豈復知有孫與曹下視九鼎得復失何異九牛亡一毛嗟兮漁子獨何幸得與此輩同遊翺登堂拜翁併謁姥顧盼長幼皆英豪問古答今情頗洽留客夜飲談風騷須臾風靜月初上金盤湧出長松梢明晨相送忽迷路高者絕壁深坑壕如今桃花處處有何必武陵堪放舸無秦可避且休矣焉用逋隱爲名高

咄咄謠

落槐日暮號霜風披褐咄咄書秋空相傳澤國歲星守啼饑不到江南翁塘蒲隕綠螿蛄泣鶴鷗夜啼螢影濕

往溪齋集 卷二
稻粱不足菰米炊江魚啣沙向人立丈夫出門王事勞
婦呼嬰兒踏桔槔虎蹤遶宅吏追稅晝夜豈得停呼號
青編有字不堪煮曼倩饑來還索米空將蠹簡葬英雄
千載寒塘鬼燐紫

放言

奇雲斷處借山補黑月空村走乳虎墓底劉伶醉不醒
祖生空蹴聞鷄舞小兒搏弄造化羞天驥伏櫪隨犁牛
豪士雄文棄不用廝養賤卒封公侯放歌莫惜盃中水
飲斷黃河一勺耳豆棚遊戲沐猴冠天下榮名半如此

有書休教兒子讀萬卷不如五斗粟有錢須教兒子賈
錢多買官支門戶門戶不用官府支君不見今之卿相
爲人欺

澄江釣魚行

釣魚老翁頭半白獨立江南望江北殘雨瀟瀟帶亂雲
臨江春草傷心碧海門不見殘虹挂古樹參天密如畫
遊子乘船去不歸商女當歌淚交下江邊可有遺民聚
三家兩家依古樹雨裏炊煙凍不飛風中過鳥啼還住
三十年來回首處江城炮火雷飛碎綠髯男兒死竹根

紫簫美女胭脂淚而今只有沙頭鷺夜伺雙魚啣尾度
鬼火迎風亂草焚夜潮和雨掀天怒明日江頭觀競渡
三閭何在江如故獨上城西百尺樓一夜蕭條髮垂素
竹如意歌

宋謝皋羽山人憫宋之亡登嚴陵西臺痛哭以
竹如意擊石而歌竹石俱碎感而作此乎之

山人手持竹如意冷冷若有神仙氣登臺擊石作浩歌
歌罷天雲忽陰暝西臺雲樹東臺石義膽忠肝人不識
中原碧血化爲烽秋葉如瓢墮砂磧有恨空將如意舞

山人山人爾何苦丞相還思舊汴京王孫已去新漳浦
請看崖州海邊路不見南朝幾堆土天寒歸來石馬嘯
日暮携出金盤古吁嗟兮山人山人爾莫舞

河上曲

河上東風四月時薔薇花發柳成絲忽逢南陌行人到
駐馬停車問所思所思今在江州道春酒沾衫花壓帽
十千一宿酒家姬得意爭如歸去好妾猶年少郎輕別
待得郎歸髻如雪郎今強壯妾不見郎到歸來容髮變
猶記年時郎在家庭前手種垂絲花垂絲長大花滿樹

日暮惟有雙棲鴉

龍堂曲

真珠簾開滿堂月
腥風夜隨海雨入
珊瑚插瓶光紫紅
素電青霓尾相接
龍姑四十垂煙鬢
龍女二八瓊珮珊
天吳稽首石堦下
河伯獻酒瑤臺間
丁丁銀漏瑤宮曉
海底看天玉蟾小
鮫人競奏紫絲箏
聲落扶桑悲未了
此時南浦愁雲壓
水鏡沉沉啓霜匣
漢女湘妃定有無
紅顏老大生鱗甲
君不見蓼花萋萋白蘋處
迴風吹山波沒樹走馬誰歌白石郎
極浦蒼茫起煙霧

贈劉簡齋文學

吾聞簡齋名已久
今日登堂欣聚首
數椽精舍莫愁湖
落日秋風在疎柳
先生自抱良史才
不坐玉堂隱畎畝
等身著述皆絕奇
斑馬韓蘇同一手
貫穿六籍搜淵源
攘斥老莊比芻狗
世道人心從此正
爾身宜致君側否
比來勝國史多闕
三朝文獻唯君有
彙成一書立紀傳
紫陽筆法毫不苟
上述紅丸與挺擊
彌年聚訟紛多口
中言門戶敗國家
貂璫竊柄乘蠹朽
下言趙氏一塊肉
奔竄綱厓誰執咎
漢火未墮三綱存
安忍掃除付敝帚

野史稗官忠義在干墓商閭屬某某書成擬貯名山中
太史自署牛馬走嗟哉似此用苦心心血奚啻傾一斗
今年秋試輟不與閉戶揣摩探二酉人間得失總蠻觸
何如物外但飲酒湖干野肆飄布帘門外颯颯風正吼
與君壺竭再復傾三百青錢杜陵叟架邊饒有菊一叢
此景何必非重九劉生劉生吾畏友君爲高山我培塿
今宵有月當盡歡莫但烏烏擊秦缶

行路難

行路難行不得北上太行山步步車摧軾行路難慎勿

行西遊孟門道我馬躑躅長嘶鳴世途反覆甚於此君
恩如山那可恃不見漢朝三長史帝眷同時縮金紫竟
被惡言讒一朝盡誅死邯鄲美人矜花容行年十五入
漢宮驪山甘泉賜湯沐兄弟戚畹俱重封華落愛弛曾
幾日長門行幸從此畢吁嗟更有良家兒不見君王到
死時戚姬被刖爲人彘不如明妃嫁作呼韓妻

九日玉峯登高感事

崑城之中玉峯高峯頭樹樹霜風號古來傳是產玉窟
怪石歷亂蹲虬螭癸丑之年曾寓此同人發興攀躋勞

山巔雲起雪復大田中衰草如牛毛爾時年少倚紈袴
飲闌詩思能滔滔今復登臨隔廿載不覺浩漢困所遭
一襍彌年走萬里北恒東岱常遊遨身歷峯巒以千紀
如崑比數真秋毫常思偃息吳會間任意百里乘蘭橈
朝遊虞山暮崑阜還至惠麓誇吾曹所遊大小必有紀
遠續韓杜搜其膏今秋足迹兩山徧但未抵里心怱怱
重陽風信吼連夕楓丹霜白催持螯嗟余旅寄尙絺綌
何處故人來贈袍感時懷舊不能寢門外冷氣銛於刀

山石效昌黎體

山石怒出何崢嶸澗石破碎非其朋巨靈踏空伸一足
其工頭觸天初崩瘦如槎枒龍骨立肥如巨象無前肱
平如鏡面削皺浪側如霜風戰觚稜斷如骨肉不相顧
連如輪輻貫以繩黑如煤燼堆覆釜青如藍汁漂吳綾
短如涸潭縮龜鼈長如喬松牽老藤其間一石怪且怖
疑有神物于焉憑質則玲瓏貌古樸酷類天竺跏趺僧
千年於此誰拂拭更僕難數苔花層猿猴踐膚烏糞頂
夏曝烈日冬鋪冰獨占山腰踞當路令我碍足難攀登
却憶吳閭生公石遊人狎愛恣寢興此石委棄荒徼中

知有識者見未曾鑿之終古全未減縱欲益之無可增
峰迴路轉倏過眼前山百怪逾憑陵奇出意外堪發笑
笑之不足轉可憎借如塞滿天地間焉有嵩華與泰恒
咄嗟觀覽自此畢孰謂造物無全能

陰雲

陰雲四垂黃霧塞西風獵獵摧枯棘不獨天地爲蕭條
壯士對之慄無色瘦驢不行毛如蝟車輪欲駕牛脫軛
前望長路何漫漫嗟我胡爲遠遊客

秋詞

夜窻熒熒秉秋燭不知白露溥華屋愁人無寐起彷徨
惟見秋莎繞階綠月朗河明星不多數聲砧杵奈愁何
故園一樣同秋色江上偏聞欸乃歌

悲哉行

甲申四月吁可悲山東歲儉無蕨薇流亡遍野居者稀
菜色相枕尸纍纍殺人食肉甘似飴冤鬼塞路啾啾啼
啼聲上徹天爲低旱魃叫嘯來相隨朝存暮歿人自危
擁金積玉徒爾爲千錢不換一勺糜長腰大腹成雞皮
兒行出門母牽衣餓死相守慎勿離村東掠人賣村西

在溪齋集 卷二
筐中何者骨與肌聞有縣官出賑飢吏胥中飽仍虛糜
哀哉婦子徒相携爭餐顛蹙死路岐聖明念切方宵衣
九重聽高誰得知幸而秋成再相貽悲哉千門無子遺

瑞雪篇

龍伯宮中剪碎冰玄雲挾之俱上升天公尙嫌形體拙
特命滕六加觚稜初如輕鹽布平野漸作亂絮飄鴛瓦
如瓢如手漸擴克俱是朔風搏弄者 帝城金碧看欲
迷茅堂土屋色與齊瑤光徹夜燭幽谷不知昏曉愁天
鷄河寒作冰冰積土土上行車成廣路此時水陸俱茫

然但見千里皆瓊圃農人相向稱豐年且沽斗酒烹羊
肩由來此瑞不易得 帝力于我真無邊

題吳秋潭三像

秋潭先生道士裝有時跌坐如空王有時攤書反儒服
畫向紙上俱軒昂或問先生爾何者先生貌溫氣逾下
胸藏丘壑世莫知終日置酒談風雅風雅于今久不談
孰能談此稱奇男三教同源據高座如先生者真無慙
往來長安二十載名孝廉中老前輩鳳池特名猶棹頭
願試經綸居縣宰縣宰仍爲需次人茸裘跨馬衝寒塵

先生不以是為苦公車雖傲牙章新何方長吏能刮目
 何處蒼生有奇福何年臺諫虛清班仍待君來秉機軸
 先生笑曰吾弗知吾知飲酒且賦詩出圖三幅示其友
 為我洒翰而題之悠然寄興濃深處多在雲烟與林樹
 莫戀珊瑚拂釣竿十年將相方歸去

往深齋詩集卷二終

往深齋詩集卷三

闕里孔翊宸先生鑒定

錫山顧彩天石甫著

傳鐸振路

全選

闕里孔

傳鋌西銘

青陽羅筮豫志行校正

七言古詩

蘇小小墓

柔花嫩草玲瓏石細雨為簾霧為席中有佳人蘇小墳

風流宛在西湖側，佳人不記何代生。至今樂府傳其名，
湖流不與情斷絕。煙草想見容傾城，當時歌舞推第一。
油壁車中覩，救出天下才人盡。解憐無因贈與同心結，
李家王孫三字詩。西陵翠燭風雨吹，至今題墓稱絕唱。
和者往往情傷悲，清明寒食歲復歲。墓上棠梨風剪碎，
猶有黃鶯繞樹啼。聲聲彈出胭脂淚，西湖一片冷艷波。
滄桑浩劫知幾何，王侯將相塚千萬。耕者剗盡爲平坡，
如何卿墓千古在一過。一圓人感慨埋骨香，爭十里荷
遊魂月夜歸。環珮如今豈無絕世姝，芳香淪沒賢同愚。

不見路傍朝雲塚，手披荒草空躊躇。

諸暨疊石菴觀陳章侯所畫三世佛像歌

疊石礪碗松樾踈，清晨入寺暑氣無。奔泉入雲翠欲滴，
萬壑咄咄啼鷓鴣。僧言此地有名迹，古佛三軸章侯摹。
莊嚴色相儷天竺，鐵筆幾摺袈裟麤。釋迦高坐蓮瓣中，
左爲普賢右文殊。所踞本是兩怪石，巧與獅象同形模。
細看筆法皆極簡，傳神只在眉與鬚。章侯昔日擅盛名，
一幅價值三千蚨。至今懸像像如活，妖魅望影皆逃遁。
月明夜靜默有禱，香風颯然來室隅。琉璃五色作光怪，

在溪齋集 卷三 二
常恐飛去三毘盧余爲江南一腐儒頃來避暑梵宮居
跣足見像那肯拜但以畫好在而呼中原氛祲未盡息
滄海鯨鱷猶奔驅誰將神筆繪猛將草寇望見消狂圖
嗚呼九原再喚章侯起今日所畫當焉如

讀宋史

君不見高宗南渡神州裂汴梁城中鼓聲絕艮嶽蕭條
駐夕暉行宮慘淡隨邊月臨安蕞爾寄一株兩宮白骨
黃沙餘鄂王斬王奮忠勇恢復誓殺南單于金牌誰降
霄漢間朱仙義師灑泣還報讐不遂反稽顙他日立馬

來吳山偏安小小孰如宋賈相胡爲威獨重葛嶺巍峩
起第門炎炎勢炙丘山動江北連年羽檄飛平章不遣
救重圍公然膝擁如花女醉倒金樽琥珀醅木棉菴前
一夫怒玉帶宮袍廁中污已報官家入海航千山草木
悲秋露帝座翻爲戰血腥西湖冷落少人行匡山百戰
樓船沒海面風吹鬼火青熒熒只有文丞相擊楫悲吟
氣逾壯老骨終殲柴市中詞人徒哭西臺上誰作浮屠
號鎮南杭民舉首淚氾氾冬青植處理龍蛻知是昭陵
第幾函君不見蓼花萋萋六橋路錢塘江湖拍天怒天

竹宮前白髮僧猶自悲涼說南渡

雨雪嘆

客寒天雨雪客饑晨炊絕天雨雪尙可絕炊不堪說揚
州城中多大賈高樓去天纔尺五朝朝小婦捧鴛笙夜
夜賓筵擊鼉鼓

湖上怪石歌

我行湖上見怪石離奇彷彿神鼇脊下有七竅發水聲
首獨混圓如太極自然終古未轉動豈屬愚夫能棄擲
山下狐狸見却驚湖中白獺曾相識每當明月夜深時

怪影起立如人直背上苔花落數層腹間浪影高三尺
天寒樵子望山脚日暮漁人歸大澤相逢沽酒坐石間
話到滄桑淚沾臆

長星勸酒

銀河無光參斗黑長星妖芒亘天白會稽太傅酒未醒
典午河山半傾側昌明二帝讖已成建康宮中無鼓聲
舉朝盡是麾塵客誰料寄奴今又生長星勸汝一杯酒
自古帝王誰萬壽惟將酩酊換山河熒惑從教入南斗
夜深別院羊車鳴宮鴉飛散鬼火青君不見清暑堂中

往溪齋集 卷三
錦衾裏君王怨氣如長星

金陵舊吳王城歌

吳王城中百草荒吳王舊內炊煙黃昔人割據餘王氣
山環江抱城形方宮墻基址半頽落碧瓦尙甃雙鴛鴦
東西殿廡彷彿在老圃築舍瓜畦傍城外官街架高榭
廣列茶肆迴長廊至今登樓眺城內猶有宮樹森蒼蒼
落日鍾山澹餘映飛雲片片陰無定牧豎樵夫次第歸
龍樓鳳闕成寒徑吁嗟彼亦三分雄後嗣不勁爲人攻
地經六代數十帝珠翠漸滅繁華空頗怪烏衣舊燕子

兩兩對語斜陽中其聲悲咽難盡解似歎昔日黃鬚公
何況王謝之微功新亭涕淚煙溟濛眼前古意弔不盡
衰楊慘淡來悲風

大鐵椎歌

青華鎮南遊俠客袖帶鐵椎長四尺當關劫奪鋒莫撓
幾處報仇人不識河北豪右大者誰懷州宋生技擊師
座中延此健啖客一飯可竟千熊羆飲闌潦倒引枕卧
鼾聲如牛一何怒腰囊磊砢多白金主人那敢詢其故
酒醒夜半忽躍起笑謂主人吾去矣此中某某綠林豪

今夕約戰下蔡里主人爲言吾助汝客謝揮手慎勿語
我徒彼馬衆且能如君豈足當一旅袖椎竟出誓搏戰
箴策一聲鳴枕畔鷄鳴月落廣場空四山鐵騎來無筭
一夫中椎千夫走血肉淋漓不停手曉風歛起鬪正酣
瞥然辭去成烏有寧都魏生文不朽山來選之入稗藪
魏叔子有傳張山時平不用若輩人惜乎鐵椎何處埋
來選入虞初新志
風塵

楚州女

憫馬氏
僕婦也

楚州女何命薄生不辰嫁人僕家無半屨惟一襪主人

事遠遊隨夫去天角可憐未諳風水苦中道呻吟疾忽
作兒夫驚且駭婦病不知藥三更泊船處溘焉歸溟漠
舟人太無情勸之委溝壑倘非賢主人何以有棺槨燒
黃錢動鋤纒生在淮河濱死葬溱陽郭草蕭蕭兮風索
索兒夫棄之去吁嗟一靈焉所托楚州女何命薄

漢口行

浩瀚此江水令我心神清曲折流萬里南抱武昌城武
昌南有黃鶴樓北對漢陽鸚鵡洲當時李白若搥碎漢
水亦應爲絕流漢上晴川閣對峙中間大江奔若駛鄙

夫覩此心亦開何況磊落之奇士芳草萋萋有若無鸚鵡洲今沒荻蘆頗憶當時狂鼓史金聲一賦爲捐軀不死曹瞞死黃祖令人短氣悲千古青蓮無罪但能詩亦復長流夜郎土天生才子豈偶然坎軻終老無人憐江山亦愁遭播弄不許風月常嬋娟半遭遷謫半讒死化作楚魂沉碧水湘靈開宴邀衆賓鼉鼓夜寒聲不起我過鄂渚時值秋黃花兩岸相對愁連雨今朝忽開霽軒轅戰退千蚩尤買得黃魚肥勝雪桑落釀熟開新篔折花沽酒復烹鱸登閣一醉他何求君不見襄陽樓船萬

餘斛賣鹽買得人如玉風波歸去醉揚州不省人間有書讀又不見高牙大纛叱咤聲卒伍轉盼成功名江邊徒步齷齪者虛負河嶽之精英人間萬事總可歎白衣蒼狗寧爲幻明朝打鼓發洞庭武昌又隔千峯青

近遊舫歌送吳青壇侍御罷官歸禾中

御史棄官如蟬蛻金河水開棹催發春明門外柳無枝早爲行人盡攀折御史建言當盛明言雖不用名已成歸囊瀟洒無一物惟載茶鐺書籍行自言去作五湖長鴛湖鶯脰閑來往携書携客併携樽新製一葉近遊舫

曾歎屈平賦遠遊洞庭搖落湘潭秋更憐去國鴟夷子
不及張融岸上舟心隱何妨身不繫徜徉只在溪山裏
朝遊北固金焦峯夕宿吳閶錦帆水其間任意何所適
不離鄒湖與震澤推蓬望月如故鄉何似蘆溝帶寒色
有時烹魚酌美酒不論山僧共漁叟忘言擊揖鷗鷺馴
還認當年繡衣否無端碌碌京洛塵蠅頭蝸角能驅人
豈知壯夫釣鼈志欲傾東海滄其身君不見東陵瓜彭
澤菊千古何人繼芳躅朝廷他日訪元真一枕蘭橈睡
方熟

贈華陰王山史徵君

書可讀田可耕可以不羨身後名水可釣圃可菑可以
不願王者師諸葛相清河侯當其抱膝捫蝨日於世功
名無所求如何殷淵源一日見廢棄書空咄咄生牢愁

李箕山畫山水册歌

李生畫石如畫龍太陰雷雨來千峯李生畫樹如畫鶴
蒼松古楊俱瘦削有時畫中着一艇凌波欲破滄江影
有時畫中着一牛夕陽小童牛背謳有時畫中天欲雪
雪霽千山萬山出有時畫中天欲雨雨歇紅霞光縷縷

有時着色赭復黃荆關筆力不敢當有時但潑濃墨汁
米老見之驚起立此等畫手世所稀我恨古人不見之
古人不見我得見如與古人相對面况君篆刻又擅長
鐵筆劍戟垂鋒芒半生徉狂走吳楚今復何爲滯東魯
手持兩冊索我題我詩前有無數詩我歌且長題無處
題處無山并無樹箕山箕山爲爾歌我詩爾畫相憂摩

海陵徐孝子夫婦歌

君不見海陵徐孝子割肝食母病立甦其妻感格亦純
孝棄兒留乳哺其姑誰云奇節不可蹈精誠上達蒼天

孚一門雙孝不受獎但有芳譽傳名都嗟爾虫虫木工
子豈識人間有青史毀傷遺體竟何妨反哺慈烏孝如
此東家老嫗呻吟哭懶婦擁衾睡正熟睡正熟夫來歸
母疾不問披妻幃嗟乎何人得似徐孝子荷戟邊廷爲
王死

追悼孫大蘇

大蘇桐城人方攻士姊丈也庚午七月舟覆於
江而死余初不識其人聞之攻士乃慷慨能詩
文者故作詩以弔之

秋濤蹴天江月白才人悞作鮫宮客笠篔猶自倚門彈
魚腹有書傳不得寒沙堆骨骨未沈長鬚舊僕來相尋
千年老蠹化脉望清淚滴如滄海深短衣負笈荆門道
屈子沉湘賈生弔方家兄弟泣離羣只爲孫登罷長嘯
携槩剪紙招魂去記得洲邊桑一樹鼃鼃聞哭亦傷心
莫向當時送行處

報恩塔

昔日永樂帝北征至榆川黃沙萬里絕煙火望見北斗
皆南旋窮兵黷武竟如此何怪骨肉相熬煎金川喋血

叔欺姪讓皇削髮奔於滇方練齊黃駢首戮景清藁死
猶揮鋌忠臣碧血流九泉空建浮屠高插天至今報恩
刹金碧何巍然九層突兀起空際戶外星斗如平懸象
教雖有力安能蓋前愆舍利雖不壞焉知三百載後滄
海爲桑田噫嘻桑田復滄海此塔終不改請看靖難諸
子孫今日猶餘幾人在君不見漢之文景周成康雖不
建塔長流芳陳之霸先梁武皇捨身佛寺終危亡國家
興廢何預佛昌黎所以上疏焚其骨
君不見效杜少陵

君不見南雁喜就陽君不見代馬嘶朔風萬物各有異
志趣人生嗜好安可同申生設醴遂不去素王燔肉辭
魯東丈夫不爲誠懇意何故歲暮羈旅中羈愁旅况不
可慰山鬼夜夜號枯桐

錢塘射潮行

昔有唐朝錢太尉保據兩浙稱雄州號兼吳越意未盡
投鞭欲遏錢塘流雖有強弩一百萬天生潮汐來滄洲
謾傳武肅射潮處分水不假三犀牛天目兩山王氣盛
何故百歲爲諸侯終焉納土歸大宋表忠遺觀碑空留

人民悲思王不返宮殿鬱鬱生梧楸興亡代謝世相閱
更問南宋今存不武肅後身高宗是此語茫昧真堪羞
頓首北庭任賊相舉動往往多愆尤藉之報怨無乃甚
偏安不及孫與劉厥後子孫竄閩廣浙江唾手輸仇讐
爾時北船駐江浦潮汐不至南人憂嗚呼天不佑趙氏
水伯亦得操戈矛如今錢趙兩陳迹六陵麥飯啼骷髏
吳山一望滿眼愁八月九月多潮頭弄潮小兒出復沒
此中豈有錢王鏐千古英雄如夢裏無心輸與沙間鷗

築隄行

在汝雅集 卷三
去年築河南隄隄高上與青雲齊今年築河北岸岸被
河侵連復斷年年濫費水衡錢屈指工程無一半築隄
老人淚如雨曾向隄傍種禾黍苗衝壞室廬空今日
却鋤田下土官來督工不得語畚鍤無休更鞭楚安得
身爲被髮翁截流徑渡呼天風身死尙作筮篋引勝似
委骨泥沙中泥沙一日增一斗君不見猶役生靈種楊

柳

老壩口

河流黃白日荒一望極千里沙草何茫茫老壩口津吏

守低處無寸田高處但種柳江南五月槐成陰蟬聲相
送清江濤到此忽覺風景異藹然勞役傷我心傷我心
渡河去火雲燒空無滴雨今夜扁舟宿沙渚沙渚上鬼
夜呼乃是多年沉水之鬪顛岸有鬼馬林鬼烏烏啼馬
走鬼亦作隊而奔趨河風夜涼腥帶血推蓬無人一片
月一片月歸夢頻嗟我何爲行路人

九歌圖爲孔宏輿博士題

東皇太乙何煌煌羽旗前導蚩尤張玉輪躔天赤馴翔
從者冠蓋隨風揚玻璃競進沆瀣漿九天瓊瑛作糗糧

往溪齋集 卷三
雲中之君雲錦裳五龍繽紛在其傍光景滅沒不可望
湘君啼秋班竹房俟帝不至空明璫妹稱夫人讓娥皇
上帝有命封於湘欲行不行意徜徉司命大者主壽康
挈人生死歸縑囊少者遊行樂未央善擁少艾凌秋香
美人胡爲忽滿堂瞬息下見蛾眉霜云胡不歸醉瑤觴
東君坐惜春載陽桃李萎落蕭艾芳河伯隨波去無方
兩蛟夾轂遊碧滄歸來冰簟肌骨涼手把芙蓉朝太行
毅魄無主日國殤貫戈持矛意堅強山鬼幽艷非世穉
悲思公子勞中腸前驅赤豹爲騰驤禮魂緩舞答上蒼

短歌微吟應清商凡此屈叟所寄將名公繪出神理長
太史得之善裝潢還與楚詞同弄藏

中秋紙塔燈歌

維楊地饒俗奢緩令節嬉遊士女滿况逢桂子飄天香
中秋月出大于盃小兒拍手舞且謠老人擊鉢復敲盞
市中瓜餅盡騰價酒肆吹裂萬銀管晶燈晃朗垂戶牖
十丈紅燭猶嫌短儼似帝京上元時火樹銀花搖纂纂
五彩浮屠誰所造七層直上無委婉縛葦作柱紙作墻
中藏列炬不可笑簷牙外啄鈴鐸施金像內設香爐煖

右溪齋集 卷三
三
巧妙似運公輸斤輝煌直逼慈恩欵遂令兒女傾城出
遂令跛躄蹒跚看遂令耕者輟其鋤遂令工人罷其鍛
遂令一隅鬧轟雷遂令徹夜無間斷我問此塔費幾何
答云幾及中人產只愁風狂雨脚橫片紙不復能自捍
胡爲費此無益財坐待頃刻成糜爛不見下河昏墊餘
鵠面鳩形相聚歎水寒月黑夜無燈茅屋注雨如破傘
此曹寧識今何夕我輩不恤猶宴衍願持滫巧昇祝融
無使歡極翻悲惋

廣陵謠

廣陵城下秋風起蒹葭蒼蒼竹筵筵廣陵城內盡流民
挈婦携兒丐城市市中車馬喧成羣富兒甲第高人雲
黃花綻金桂墮子美酒肥羊會衆賓緩歌妙舞傾臺榭
白晝歡娛還卜夜爾輩生爲富貴人安知外有流離者
去年水患無田禾今年房屋漂沒多魚莊蟹舍生事在
一半桑田沉白波黃淮波高堤岸圯衝決一來千萬里
縣官不惜水衡錢朝議惟憂塞瓠子炊烟蕭條白日曛
葦墻土屋如生墳兩河使者巡行數習見鳩形鵠面人
煙花漫說揚州好十萬腰纏幾人到二十男兒傅粉姿

容華轉眼成枯草昔年金屋貯嬌姝今日荒亭古木餘
始知貧富同一轍幾家愁歎幾歡娛獨有平山舊僧寺
夜夜鐘聲度江水驚得扁舟旅夢醒秋帆已入荒煙裏

爲楊丹巖題補袞圖歌

袞衣繡繪皆山龍日月藻火分西東自非郊祀與朝會
未始褻御于皇躬古人只言仲山甫能以補闕彰其忠
乾坤正氣丈夫得文綺璀璨羅心胸丹巖示我此圖畫
展玩愔悅疑于衷有美兩人坐促膝金針挑逗煩神工
蕭酒誰家少年子凭肩側立看花容得非昔日管與趙

漢王露坐成臯宮薄姬私語亦繼至御袍織指方親縫
掖庭秘事無不有外人那復窺其蹤終信絲綸出女手
男兒雖巧成何功日華浮動五雲麗但與繡出鴛鴦同
咄哉此畫豈嘲諷庸有至理存其中吾徒儒生且袖手
勿以小技誇雕蟲

爲程鳳雛題夢中香浮小閣圖

踈枝槎枒雪萬片石磴迷離月如綫香浮小閣迥臨流
正似當時夢中見先生不作羅浮客誰與寒梅問消息
閣中几榻靜無塵唱和猶存舊詩帙夢時不識小閣名

但覺心與梅俱清焉知異日石門道忽逢此境如平生
石門昔作楓林里乃是明初隱君子布衣獻策動君王
還伴梅花築煙水楓林去後來鳳雛鳳雛愛梅絕世無
仙人本合樓上任始知昨夢非模糊而今畫出梅邊閣
新月柴門宛如昨鹿門輞水想當然何處別尋真洞壑
二月廿一夜雪

江南二月如嚴冬十日九日號天風一宵硬雨密如織
散爲六出花濛濛天低壓山山復暗玉液瓊波流汎濫
疑是燕然九月時撒鹽捲絮平鋪壑穹蒼胡爲長匪仁

不使大地回陽春柳恨花愁解不得麥苗菜甲何由溫
近聞龍馭將南至翠蓋拂天行若駛會令四海沐陽和
一掃人寰絕泥滓

維摩寺銀杏歌

君不見維摩寺裏梁朝樹迥立深山最深處五十圍根
虎豹藏三千尺榦精靈聚霹靂時從頂上過鴟梟那敢
枝頭踞自然不受斧斤傷豈比尋常棟梁具山中老僧
雪滿頭爲言住此九十秋寺興寺廢凡幾變山前碧海
今平疇不曾見樹有衰老開花結實年年好直下君看

吾谷楓疑是青青路傍草

贈程心弁

新安名勝不可見常識新安友人面天水黃門屬父行
廣平侍御稱姻眷或從花底共清樽或向文壇肆酣戰
餘子紛紛傾蓋多不將富貴驕貧賤先生氣誼夙所欽
年譜曾聯况親串幽賞能於物外探奇琛未肯逢時獻
往來吾谷與黃山飽飫烟霞色平善卽今泛宅比陶朱
若使籌邊定劉晏惜哉結契不在早嗟我揚帆去如箭
他日黃山恣快遊登堂復接君歡讌

壽宋射陵先生

射陽湖畔徵君府壽域雙開敞琮圃南國重輝南極星
西池再降西王母曉鐘畫角天關穿東溟日出金輪懸
憶從香案謫人世又見齊眉八十年才名自是神仙列
徵起前朝簪綵筆文如燕許字鍾王夜擁青綾晨挂笏
爾後滄桑事改常故宮禾黍鬱秋香邵平歸向青門隱
還似梁鴻挾孟光 興朝俊髦何濟濟薦牘交陳宣室
裏先生堅確抱古心頻以諫官徵不起築圃如枰自種
蔬長鑷帶雨剪還鋤高堂賴此供甘旨五鼎三牲愧不

如悠然抱膝何爲者尺幅龍蛇恣揮洒江淮一字一兼
金不在南宮子瞻下卽今倏及杖朝齡風骨瘦健神逾
清茶烟髮影入相對依舊丹山雙鳳鳴長君五十斑衣
舞季子文名天尺五會看茅屋賣弓旌存問終須及轅
固

故友方攻士李萬資吳青霞俱聚金陵一時重陪

喜而作歌

人生百歲能有幾一別故人俱老矣安得我輩皆長生
不似世人容易死我曹憶在京邸時五日一酒三日詩

長歌痛飲夜達旦主人是誰客復誰李侯俠氣轟雲漢
吳子熱腸金可斷放膽湘槎與寓安悲來善學山猿喚
復有林生字桐叔詩常驚人不可讀下視梁園鄒與枚
何論潘石誇金谷爾後萍踪各自分孝王門下惜離羣
青山不墮綠樽月白髮欲變蒼梧雲安知今日白門柳
一折四人俱在手未許全論別後情何妨且進杯中酒
塞雁黃雲撲地來與君同上雨花臺燕山一會猶如昨
咄咄林生安在哉我今九秋尙無褐北望長安豈能達
故鄉雖好是窮途何處差堪覓生活惟餘一片飛騰氣

好友相看拭珠淚勉作長干十日留不須歎恨貂裘敝

雷塘曲

雷塘陰陰滿梧葉大蟬小蟬噪聲接人間酷暑自銷金
古隧陰風吼仍急青荷側動金蟆翻夜螢數斗流蘋灣
昔時煬帝亡國淚至今碧火燃其間棠舟夕維避殘暑
吳商貪花載楚女雙星卧看隔迷樓別浦歸霞作秋雨
點滴銅壺咽不聞莎鷄聲報夜將分玉鈎斜畔如環月
照見蒼苔故築文平山一秋腸一斷况復悠悠古今換
君不聞二十四橋吹玉簫明月到今無一半

武陵行

武陵之地廣千里今之容陽無乃是千峯環抱萬壑橫
何怪昔日迷漁子不信試閱桃源圖風景何曾異於此
憶昔故老初避秦天開異境留隱士其時桃花正滿山
澗中流出桃花水饑餐桃花渴飲泉六百餘年長不死
豈無鷄犬與桑麻風俗仍如古初耳三分兩晉多戰爭
唯此一區稱至理是以仙源暫一開後人欲入無由矣
如今承平寰宇泰化作通衢人濟濟虎豹馴良盜賊無
險阻亦不傷顛趾我來正值桃花候猿鶴相呼不能已

架巖疊谷爭青葱捫葛攀藤亂紅紫好山借問皆無名
恨不移來置案几天台雁宕知何似武夷九曲徒誇美
尋幽未必真遇仙風餐水宿空饑餒寧如我更有主人
水閣山樓借行邸一吟一詠唱和多留與山中徧作紀
借問主人名姓誰吏隱容陽田制使

觀魚二首

江深灘高石參差三月四月魚滿池使君放艇集賓客
小舟刻木乘漁師一夫躍入衆夫繼跳浪似欲擒蛟螭
須臾得魚十數尾皎若白雪肥凝脂試問臨淵結網者

世間此技誰能知

橋東橋西石作渠水清胡爲却多魚靈湫澄徹深百丈
自古傳有神龍居使君驅龍龍遠徙瀕洞古穴成空虛
嘉魚舉族聚其裏自謂不復遭余且焉知今日竟爲鱸
造物意在刪羸餘吾徒自縱濠上樂豈忍效彼絕流漁
小崑崙依韻酬答見贈古歌

壯哉小崑崙平山天險依爲根上有百尺臺出自仙府
之體裁奇峯萬疊遶前後雲璈泠泠半天奏泉清石皴
怡我情豪興幽思來輻湊田文座客皆名流笑殺王粲

依荊州雷門布鼓誰敢撾使君雅度許我遊詩盈李賀
一錦囊好山好水留徜徉半夜女郎歌妙辭聲情文采
不可當盡將海外烟雲態一滌俗腸使我快蒙莊有三
兼得之天籟地籟與人籟臨別依依情轉深長歌彌見
古人心要當預訂重來約莫使良辰獨在今

有懷戶部孔東塘

憶在京邸初分時岸堂別我有所贈清樽在手未忍空
蹇驢欲跨淚痕迸別來忽忽四載餘嗟君宦海何蹭蹬
朱紱遂因詩酒捐白簡非有貪饕證才情自足比管樂

高致豈獨輸嚴鄭神武旣掛便合歸進退綽綽良有命
胡爲京洛久滯淫無乃囊底錢告罄到君梓里將一載
逢人問訊奚啻更昨者借山從北來言君近况佳且勝
閉戶不出著異書頻有客到蒼蘿逕曾點鼓瑟聲鏗鏘
杜甫揮毫句蒼勁憶君初筦九府錢不以貨殖師吳鄧
到今悔乏買山資極知貧也原非病先生似應接浙行
長物何足隨鞭鐙歸葦石門屋數椽遣此夏日如坐甑
白環重賜會有時瀟灑洗毀復待聘林下固應勝市朝
丈夫出處期於正

壽衍聖公鍾在先生

水晶屏開錦堂畫綠荷踈風透槐柳玳筵兩部按歌人
手捧霞觴露爲酒去年今日來稱壽今年今日還依舊
但願公壽如南山肯惜追陪衆賓後公家世譜自史遷
遙遙歷歲逾二千魯侯傳止三十六公已六十有七傳
與朝天子重儒宿錫公極品腰白玉每逢奏對霽龍顏
再拜賡颺問風俗膠城才人孫太史幸魯書成奉恩旨
一言重薦入詞林噓冷吹枯可知矣長君英邁駒千里
次君眉宇真國士架堆萬卷鄴侯書吐納風騷繼溫李

九重絢爛頒文綺體視公侯世勲子服茲章服舞萊衣
每日趨庭問詩禮家門鼎盛豈待言好賢下士海內傳
有似昭王延郭隗劇辛鄒衍俱歸燕方今風雅時所尙
鄒魯開之勢居上自然名譽滿寰區天下騷壇推絕唱
金風浙浙玉露清客來問字屢不停顛倒赤舄相逢迎
正值五老初降庭尋常祝嘏那可道仁者如山長壽考
且卜明年今日時公顏更比今美好

朝臺弔古分賦

强秦失鹿中原荒楚漢競逐茫茫嶺南千里無帝制

尉佗於此僭稱王海天鰲柱從空起樓殿連雲壯無比
黃屋傳呼動地來紅妝擁醉蠻煙裏半壁摩崖塊獨尊
眼中無復漢乾坤寧知家在常山郡墓樹青葱尙受恩
使臣握節儒冠到直上高臺宣漢詔跪稱南越老夫臣
退就藩封歸帝號從此更名朝漢臺登高北望烟雲開
尉陀今去已千古陸賈風流安在哉我登庾嶺望帝京
鳥飛猶作半年程五羊去嶺更千里一統車書今太平
兩階舞羽三苗格不在兵威在文德不見亂離割據時
春明門外皆敵國

早起平山最高峯客館

昨居芙蓉城猶在人境中今來平山頂寢息最高峯天
鷄夜半喔咿叫海日先從下方躍須臾雲霧漲山巔截
若劍光橫出鞘大峯小峯俱潑墨米顛有筆畫不得化
爲雷雨固莫知煥作晴明更難測欲眠晝然門戶開曉
鶯杜宇飛鳴來擁衾自分非久計早起無事空徘徊徘
徊且坐盤石間俯視蠶叢鳥道之危關天心之橋入地
底猿狙童叟相牽攀如今李白倘猶在不復浩歌蜀道
難噫噫蜀道難其難未必如平山遊人過者盡却步我

獨何緣兮起居寢食於其間

五經堂食笋用韓文公贈崔立之韵

從來地道竹最敏屈曲蟠根抽不盡湖山側出裂石膚
岐路橫生礙車軫裊裊千竿拂雲上琅琅百尺搖風緊
其顛彷彿栖鳳凰其下幽深螿蛟屢墮籜所積成山堆
濕熱之氣蒸蛙蚓稽阮諸公來坐嘯子猷動色頓爲哂
曾聞曳杖有神農兼可烹調待伊尹家家此味足江南
竹不干畝稱貧窘過淮漸覺少篔簹無乃地氣相矛盾
五經堂中一叢茂四月行根細如韜萌芽正望吐新篔

詎忍斬別同孫臏胡爲數竿夾樹發佳木被欺良可憫
割愛斲之非有他欲令遊鞭暫遠引斲來剝白付庖厨
今日午膳初供筍鮮于乳羊纔出胞嫩似雛鷄乍離牝
中藏密節渾難辨徑寸黃芽質輪箇不加鹽豉已馨香
染指老饕詎能忍憶昨携筐遠林下採摘野蔬及栝菌
菜根滋味隨手得豈比搏兔勞鷹隼古人寧使食肉無
居不種竹誠爲蠢山東甘笋尤罕遇野竹多苦愁傷腎
曷不畜此待成林致富過於讀平準况聞笋根有稚子
得笋則生失則殞勿令雨露嗟偏枯要使疎密分畦畛

一番食笋一作歌此事庶不成泯泯

孫真人几化三足虎歌

秋山木落風泠泠
瑤臺客去空草亭
樵牧黃昏跡都絕
丹池水冷涵明星
人言此地有猛虎
三足兩頭中夜舞
乃是真人几所成
天荒地老同千古
真人凭几曾注經
而今羽化几亦靈
人作飛仙去縹緲
几爲異物何猙獰
烟霞恍惚不可見
神物誰能究其變
空留影響在懸崖
還與山精夜酣戰

雨後吟

溪光倒蹴新雨
天空中玉斧鏤飛煙
虹脚踏山立悲影
蚓鳴如鐸蛙如絃
耕人負犁下奇峭
細磴盤雲戴官道
牛羊向晚恬不歸
昨夜於菟隔川嘯
蕉陰桐葉濃拂窻
夕螢逗落珊瑚床
織女機梭趁涼急
鮫人泣月珠雙雙
腸直思牽遠遊子
寫恨無聲蠶齧紙
欲出天台洞口封
清輝玉臂今誰是

牛鬪虎

虎有爪兮牛有角
兩雄相遭勢盤礴
牛恃力兮虎恃威
戰酣未決雌雄誰
大家用力盡方止
牛虎一雙巖下死

宿栗子坪

昨日下午紅毛尖石痕犀利如刀鑱今日下菩提界壁立
倒懸千仞隘緩驅疲馬出大荒林間始漏斜陽黃斜陽
黃處青一點栗子之坪在山厂我行百里喘未蘇望門
投止可緩乎且不望有粗糲食奚暇更問酒可酤解衣
踞石坐中路四壁蒼蒼起烟霧僕夫預指最高峯道是
明晨從此去

題畫魚

寒潭不波菱葉小漁舟未集空烟裊大魚戢戢小魚嬉

正是武陵溪上曉神魚自古常避人滄湄海浦潛其身
別有鯉鯁與魴鱖丹砂其尾朱其鱗一魚猶在荇藻間
一魚鼓鬣思騰騫一魚跳浪勢欹側大抵意思俱安閑
其餘小魚亦無數宛若童稚隨後先莊惠臨濠羨魚樂
魚以得水全其天畫工非漁亦非釣潑墨傳來一何妙
豈是前身夢作魚圉圉洋洋盡遍宵還愁迅疾龍門去
墨盡圖空起烟霧安得高堂素壁間終年坐對滄洲趣

十二辰歌

古簷仙鼠化爲蝠蝸牛帶涎登土屋門外風聲如虎嗥

篝燈欲吟兔豪縮十年劍匣龍精藏杯蛇弓影心茫茫
塞翁失馬奚足惜讀書岐路曾亡羊芒端刻猴徒自喜
中夜聞鷄爲誰起寄語田文狗盜人何須更學遼東豕

大魚

北溟大魚幾千里口吞樓船如啖蟻偶從人境一經過
半月猶難見其尾世人謾說龍有神借問龍身有幾鱗
此魚鱗甲百萬片一片可敵千車輪嗚呼安得太倉之
粟以爲餌釣來作鱠供甘旨中華外國皆飽餐棄骨還
填東海水

題孔東塘桃花扇劇本歌

夕陽西下鍾陵秋淮水寒波咽不流山河破碎故宮沒
却憶美人曾倚樓美人阿誰身姓李商丘侯郎天下士
桃花扇底定情時南國依然盛朝市白社同心氣若蘭
留都防亂檄如山大夫欲解清流謗偷助金釵與合歡
寧知巾幗偏持正毀妝不墮奸雄阱鴛侶飄零半道分
拚生再却中丞聘郎戍關河妾入宮無愁天子宴春風
扇頭血作桃花片妙筆仍煩老畫工中原事去金甌缺
鐵騎臨江嘶漢月冰山崩盡死灰寒望帝歸魂暗啼血

爾後萍踪再一逢
髯絲禪榻強爲容
欲尋舊約家何在
揉碎桃花數點紅
六十年來如轉燭
菜畦瓜蔓黃金屋
傷心誰是舊旗亭
閱徧興亡度新曲
臺號青陵事有無
貞娘墓上夜啼烏
請看冠蓋皆女子
只有蛾眉是丈夫
爲莊心遠題像

玉峯莊子莊周裔
自寫真容與人異
長身白皙好鬚眉
衷甲來遊戰場地
戰場中有白骨堆
嶢然露形知是誰
風沙漾肉雨洗血
螻蟻烏鳶不復窺
莊子目之久凝視
舉手欲擊無馬策
欲返其魂使復生
口不能言以臆對

或云莊子達生者
萬物塵埃與野馬
眼前常作如是觀
要使胸襟日瀟洒
我知莊子遊俠儔
裹尸馬革思封侯
怪石摩挲血斑駁
鐵衣吹動風颼颼
此中熟視有生趣
枕骨眠尸何足懼
受降城外月如霜
他日看君提戟去
射虎行爲枝江孔
振臯明府作

枝江四面山嵯峩
人稀草長猛虎多
公然越城啗驢畜
皮血狼籍橫沙坡
有似大盜入闔闔
守者不敢加嗔呵
目光瞳瞳坐當路
半飽半饑氣猶怒
草扉枯朽土垣頽
瞬息往來誰可禦
枝江明府至聖孫
白晝聞之生怒嗔

狃狃野獸不足較閱我百姓遭橫吞立召獵夫來布弩
霜晨設阱臨險阻果然一怒感山神卽於是日斃一虎
一虎伏誅衆虎徒從今不敢來城市李廣劉琨合一人
爲民父母當如此使君含笑命燃燭召客圍爐烹虎肉

黃獅行

黃獅巨首何崔巍畫工畫出形狃狃目如巖電駭百獸
張口似有聲如雷神麟獬豸勢相敵巨象畏之皆跼蹐
蠻中古壑育汝身出腹已具千牛力梯航來貢何人致
鐵鎖金籠蟠石柱至尊御殿見猶驚別敕獅房築城住

爾時弭伏凜天威俯逐獅奴出御街堵墻觀者咸歎異
謂此神獸胡爲來夏生一覩便能畫八尺生綃施墨赭
長毛大耳尾拂雲盤礴猙獰古松下豈知畫在質已亡
鐵骨變作燕臺霜神物徒傳壽千載其如束縛歸山岡
西洋老人著獅說云此極真有奇質愚者色青賢者黃
黃獅必爲聖人出騶虞不踐生草莖猘猢暴戾傷羣生
此獅啖虎如啖鼠特感聖化馴虞廷遠來不習中華土
離羣叫嘯生悲苦拘孿那得逐麟遊阗瘠纔堪與驢伍
真形物化不可留畫形反得傳千秋不信携將林下看

石澗齋集 卷三
絹墨恍若風颺颺古來賢豪亦如此嗚呼不重生時重其死

折楊柳

楊柳青青三月時河邊陌上弄春姿忽逢遠道人將別爭向長條借一枝君不見人無日不別君不見柳無時不折樹上柳枝不曾少樹下行人何日了折去明年柳復新別來幾度人偏老北出都門道路賒柳條不見見黃沙此時欲別難爲贈朔雪沾衣代柳花半生行盡關山路柳色還同故園樹饒君摠被利名牽莫到柳枝窮

盡處

龍淵歌

腥風夜捲疎林葉木魅辭巢怪鴉泣龍淵開匣吼一聲飛向空山學人立鵬鵠瑩鏐蓮花幽昔年曾斷佞臣頭佞臣顛骨化飲器直士腰間仍佩鈎拍鞘嗚嗚呼二子一雄一雌火中死堅持一點報恩心何惜千秋血痕紫血痕凝散君休道日月兩九天際老英雄不恨劍埋光但恨無功可橫草

畜恨虎

俗名恨虎古訓狐虎頭鷹喙身形麤雙眼瞳瞳照清夜
正晝無見空睢盱食甘腐鼠及腥穢貪饕大嚼肥其軀
往往爲巢穴山腹樵童牧豎常探雛得者携來鬻城市
十家九畏不敢沽是以身雖龐然大價廉不索多青蚨
我重其能却狐魅贖歸馴養同家鳧飼以蟲魚便欣悅
饑來亦食瓜與蔬見人瞋目吁可怪鼓翼似欲長嗚呼
久之馴熟入堂室恒以夜半巡庖厨乃知天下無惡鳥
奚爲愛鵠而憎烏昌黎不達並育意彎弓相向何其愚
造化如欲滅此種九鼎不鑄神姦圖憶昔賈生歎鵬鳥

安知文仲祀爰居我今視怪不爲怪雖有梟獍將焉如

大成堂醮宴紀事

開元大醮人所羨何意仙源得重見上公秋日正懸弧
公子華堂盛排宴錦棚三匝入雲高綺席千層鋪地徧
時時天外度清音往往人叢出嬌靚走馬紅兒捷似猱
盤鈴壯士輕如燕成羣隊舞歌笑喧百戲排場心目炫
堂上聯翩珠履賓街頭歷亂冶遊人上巳河橋今復覩
元宵燈火再回春此時簫鼓千門作此際華茵萬戶陳
商彝琥珀黃流注周鼎龍涎寶篆焚上客升階亞肩背

僕夫遙望徒逡巡白叟香盆思獻爵黃童竹馬來歌幽
共道如山復如阜不分誰富與誰貧主人把盞顏如赭
勞苦桑梓拱手謝遂令候吏羅珍羞不論堂中與堂下
孟嘗座止三千人今日何殊蜡與社饗人稠疊饋人忙
鞭車行酒騎行炙大開春釀百千缸捲起黃河向身瀉
杯如星散織流雲筋若蝗飛集禾稼勢同畚土填巨溝
聲似春蠶食桑柘中筵醉飽復何論末座曾無向隅者
此曹盡從田間來黃泥滿脛披草萊洗濯一時據槃案
清歌妙舞相徘徊耳目豁然皆覺異酒入歡場傾百杯

暮天席地忘日暮脫帽喧呼稱快哉老者扶筇幼者抱
賭勝分曹自作堆口腹已饜肥與甘懷袖仍携餅與餽
或遺妻子或獻母云向瑤池宴上迴會散從容命遲發
猶恐填門爭蹴踏杯盤狼籍聚梨空酒痕汗雨沾階滑
滿街扶掖醉人歸回首堂中已燃蠟或相枕席卧溝塍
或被塵泥污巾韞或迷去路強投人或故爭毆散其髮
語言大半已糲糊惟有感恩聲雜沓我觀京洛諸王侯
壽筵車馬常喧啾門牆高峻體統絕小民爭敢來嬉遊
桃李園中鬧歌板綠楊陰下繫驂騶紫絲步障五十里

珠箔簾櫳十二樓欲具崇朝萬人食豈難醜酒椎肥牛
但覺鞭長不及腹膳夫庖宰俱生愁大厦萬間不易得
後至欲坐無緣由冷炙殘杯殊草草焉能鋪啜如川流
公家咄嗟便辦此豈非聖澤之貽留許史金張安足慕
原嘗春陵良可羞更後十年看再舉排筵直接海東陬

竹夫人歌

龍孫之妻孤竹女瘦骨稜嶒能却暑帳中空自錫嘉名
不解爲雲更爲雨抱來一搦齊郎肩苦辭不敢並枕眠
撫摩徹夜極歡狎自饒林下風泠然錦衾生小非相識

但認龍鬚是安席斷藕還輸孔竅多孤筠終信腰肢直
股臂交加汗雨淋肌膚歲久色成金天寒別寵湯婆子
棄置何嘗萌妬心郎情反覆那可道輕薄鴛鴦任顛倒
不見班姬團扇歌失恩只爲秋來早

公子行效李義山體

曲水豪華三輔子少年不識文與史紅綃裹手擲纏頭
買笑聲名傾下市出騎驕馬蘭筋腴射雉金籠脫腕徐
自矜據鞍身腰裏狎客携香風過趨花鈴閣下寒珠箔
二八深藏人綽約衆中幽夢不明言淺笑深顰寄紅藥

月來月去華堂舊琴阮不彈拋擲久冷炙殘羹汗玉書
春星卽漸稀紅豆勢去貧來那可論凝脂變作黑崑崙
可憐門雀張羅後惟有烏龍戀主恩

悲千里馬

千里馬何晶晶雙顴協月瞳曙星驪黃牝牡無汝匹乃
是赤水神龍之所生文成五花汗流血朝遊扶桑暮西
極昂首自長鳴不勞鞭與策歷塊過都無一蹶夸父騎
之追白日千里馬初生時世間惟有造父知一朝餽饗
獻天子列侯卿相不敢騎天子曰嘻誰能剪拂姑試之

殿前相顧皆失色以首九叩頓玉墀是曰天子之路馬
誰敢乘之驅以馳是時天子顧且笑此馬端宜在廊廟
勅付太僕官長我十二閑秣以玉粒浴清泉露床爲寢
華屋眠千里馬居厩中耻與羣馬爭長雄幾回奮鬣吼
朔風無由却出城門東陰山狡寇時竊發長城以西多
戰骨強將駑馬克鉄騎人疲馬瘦頓更蹙豈無殘馬空
歸來老骨如山障泥沒千里馬情悲傷恨身不得遊戰
場向使早用我敵騎焉能當驃姚飛將敢深入吾當與
之合爲一兵已敗徒悔之收功桑榆更何及徒費大官

往深齋集 卷三
粒身與仗馬同仗馬一嘶便斥去我今老死誰復資成
功嗚呼千里馬從此義不食憤氣干房星身殫路衢側
羞言枯骨值千金但感昭王一片心古來英雄亦有遇
王者用之不以早嗟與流輩同湮沉

煌煌京洛行

鈿車蹀躞青驪騶貂蟬飾冠狐白裘紫雲紅霧花似錦
坐我樂遊原上樓聯翩文士皆枚馬窈窕佳人多莫愁
買笑徵歌窮日夕彈箏擊筑忘更籌望中佳氣何葱蔚
碧瓦朱甍亘城闕四序皆如蓬島春二分不數揚州月

寶馬紛馳狹道周女牆時見紅粧出不嫌小夜閨嚴更
欲取長繩繫白日共道承平化日長物色由來推帝鄉
楛矢纔聞貢肅慎白雉又看來越裳蒼生鼓腹抃且舞
聖主宵衣方未央小臣焉敢忘帝力願進卮酒歌無疆

往深齋詩集卷三 終

外日

往深齋詩集卷四

闕里孔翊宸先生鑒定

錫山顧 彩天石甫著

傳鐸振路

全選

闕里孔

傳鈇西銘

青陽羅筮豫志行校正

五言律詩

塞下曲四首

今夜關山月無人獨自看寧知秦塞外不似漢長安天

際歸鴻苦秋邊落葉乾征夫中夜起誰念戰袍寒
滿地黃沙苦將軍盡枕戈越禽飛不到代馬意如何地
險關形壯天空月影多故園勞夢想回首隔銀河
少壯無功績君王遣築城烽烟心目駭閨閣別離輕血
戰生前事封侯異代名惟餘慷慨志骨朽尙難平
天垂古幕邊月墮戍樓前見說遊兵動都忘子夜眠擒
王知不易破陣敢爭先擬奪黃金印歸來肘後懸

隴頭水

牛向隴頭耕人從隴上行由來嗚咽水半是別離聲岸

柳笛中折山雲馬首生秋風吹客子終古事長征

陌上桑

辛苦秦家婦年年陌上桑紅顏踏青草素手挈絲筐詎
恐誇夫婿還羞試艷粧如何浣紗女一笑國爲亡

天馬行

西域多奇迹俱從博望還自經宛馬入無復大行艱汗
血三千里秋風十二閑祗今餘瘦骨空葬雁門關

漢宮秋

上林秋夜月流影照長門玉輦何時到齊統昔受恩雀

往溪齋集 卷四
臺移露掌燕塚泣春魂寂寞昭陽殿空餘蕙草存

銅雀妓

奸雄千載後臺榭總荒蕪賣履名心盡分香霸業徂鄴
宮春草換漳水月明孤衆妓無情極遊魂化鷓鴣

江南卽事八首

莫愁湖上水倒影浸樓臺鳥入荒烟去舟從野渡來美
人何處見明鏡爲誰開終古傷心客登樓一嘯哀

澄江長似練迴抱石城來虎踞山形壯龍蟠地軸開仲
謀無霸畧公瑾實庸才青蓋降曹後雄圖安在哉

可憐同泰寺依舊枕臺城古殿荆榛色荒陂鳥雀聲奸

雄謀國弔天子證無生得失原由已悲哉後世名

結綺臨春閣荒基不復存烏猶悲後主水亦怨東昏蠟

炬降王淚莓苔戰士魂隋宮亦漸滅成敗豈堪論

鍾山紫氣幽玄武後湖秋多少功勳第皆成狐兔坵興

王天柱迥雜霸地靈羞策馬登高望還堪隘九州

秦淮原浩蕩城勢夾爲溝畫舫終朝渡紅燈徹夜遊佳

人鸚鵡舞公子鷓鴣裘那問興亡事淒涼白露洲

北宋兼天下南唐入版圖摧殘攝山碣啼斷石城烏勢

往來集 卷四
已非三國功難借一夫誰令下第士遊戲獻全吳
傍水尋名勝踟躕到遠峯秋心凋橘柚江色老芙蓉雲
薄難遮雁沙寒已葬蛩詩成吟未穩隔浦一聲鐘

梅意三首

香魂知未遠脉脉寄深山朔雪凍不斷春風吹便還羞
同桃杏醉寧受蘚苔斑有客衣純素歸來自玉關
古道曉寒驚高樓水月明摧殘千艷色獨立一傾城不
愛迷人眼何由入世情藍橋非有意邂逅得雲英
爲問騎驢客因誰撚斷髯一泓清澗側萬點碧峯尖酒

待高人置詩宜靜者拈寒香侵又入斟酌緩開簾

壬戌元旦

寂寞京華客初逢兩度春明窓宜對酒煖榻自留人花
鳥情俱喜兒童意亦新不須嗟旅食率土盡王臣

曉行

最是曉行愁荒鷄唱不休關河驅病馬霜雪犯征裘葉
戀初霜樹沙驚未睡鷗遙憐高卧者鄉夢始綢繆

紀遊四首

盛代提封遠燕雲在九霄地當二晉濶天入太行遙薄

海兵雖洗中原賦半凋猶聞望巡幸諮訪及芻蕘
七雄爭霸業最數武靈王探鷲雄心在坑師宿將亡平
原但絲繡毛遂耻居囊寂寞廉公墓秋深百草黃
鉅鹿孤城遠邢臺舊跡存人煙喧鳥雀寒旭散鷄豚山
勢圍仍壯河流凍未奔解鞍懷往事吾欲引清樽
平土無三尺人傳豫讓橋志甘吞炭死恨豈擊衣消趙
孟神爲奪龍門史尙標徘徊馬不進落葉莽蕭蕭

京邸宴集

刻燭嚴更後心知此會歡歌凝金縷曲饌出水晶盤樓

角悲笳起城隅落葉寒相留渾是客莫作主人看

留別同寓

轉恨相依久臨行話別難客堂秋草沒歸路寒驢單好
護殘書帙休荒舊藥欄朔風吹易水還似古時寒

漂母祠

祖龍方逐客誰敢飯王孫不意尋常母能施國士恩壺
餐雖已往高義至今存我亦饑驅者年年奠一樽

專諸塔

刺君非義士何以重專諸爲感千秋誼能捐一且軀荒

往溪齋集 卷四 五
榛緣古塔落日映空廬劍客遺風在皆因友伍胥

贈呂香令二首

聽社清流後於今屈指稀君閒首菑署我拂芟荷衣絳
帳無榮辱青門不奮飛先人高節在一任與時違
盛暑延陵客披幃獨見君誰憐廿載別遙隔兩江雲竹
露曉猶滴松風夜更聞講堂清絕地吾欲細論文

雨後

早秋仍暑氣驟雨得微涼屋角明霞隱林端虛籟長客
懷偏寂寞人事動參商沽罷青帘酒無人共舉觴

八月初一日雨

冥冥秋後雨恰在客途中去作迷山霧來兼落木風芭
蕉聽不厭絺綌數應窮寒事從今始吾思曝背翁

和塞上詩

終古長城月明明照玉關水中沉箭鏃沙際出刀環血
盡痕猶在營空騎不還因知漢天子無意獵天山

過寶應懷舊

何年喬太史泛艇此城隅宴席臨歌板園林似畫圖舊
遊仍宛在地主竟虛無薄暮揚帆去秋聲滿荻蘆

過秦郵

此邦遭水患風景異從前鷺集平岡上魚遊破竈邊宵
寒聞擊柝月黑戒行船辛苦防河戍無由暫息肩

泊丹陽

又宿雲陽郭蒼烟滿樹柯城高迷鸛鵲濠淺露鼃鼃迫
歲人情窘荒江盜警多生憎如鏡月徹夜照吳歌

由虞山頂至山北縱覽奇勝五首

茲山在人境淨不染塵囂樹色新如滌湖光遠欲飄層
巒棲靄翠絕壑現虹橋一半孤城鎖留雲破寂寥

山因虞仲著地卽子游鄉俗尙傳文學人猶憶讓王春
晴禽百囀谷響樹千章獨立雲霄外彌令古意長

劍門青到頂拂水勢迴龍殿敞當湖闢城高倚石封寺
喧晨夕梵崖聽古今鐘別有探幽逕嶽崎跨兩峯

步入青冥裏茫茫見海濤乾坤歸指顧身世眇秋毫吳
會真趨下穹窿遂失高因憐碌碌者汝亦小吾曹

稍下桃源澗崢嶸石笋多茅亭因竹柏濕水注烟蘿啜
茗堪消夏觀棋可爛柯山高已礙日歸路恐蹉跎

一窻秋影

往溪齋集 卷四
小軒宜獨竚靜意迥無雙隔箔窺朝雨臨書剪曙缸苔
深青玉案梧老碧油幢日暮幽人至踈籬有吠厖

分咏霧二首

疑是鴻荒世瀰漫四望同千山靈絕頂匹練截寒空稍
覺征衣濕難看旭日紅蚩尤酣戰罷萬物有無中
聞說天南瘴迷人正此時空崖藏鬼魅宿莽暗蛟螭行
旅愁相失陰晴總不知日高方漸歛餘緒亂如絲

吳宮

江迴三楚盡山峙六朝餘芳草王孫岸梅花使者車秋

雲橫大野落葉滿長渠惆悵吳城下魚腸伴闔閭

楚客

洞庭無木葉漢水帶秋煙杜宇千山裏啼猿萬竹邊九
歌賡野廟二女撥湘絃楚客還鄉去扁舟獨渺然

古塚

古塚知何代殘碑已失銘龍蟠迴地脉馬鬣帶山形隧
啓沙猶黑膏存火尙青王孫同腐草搖落一潭星

暮愁

暮愁安可極况復此殘年戰地仍金鼓歌樓自管絃嶺

雲遮落日山木上孤烟誰道長安近滄江已接天

邊月

邊月紛紛白關雲片片黃烽煙千壘靜苔蘚一城荒病
馬啣殘草疲兵死舊疆將軍望麟閣衰髯日蒼蒼

易水

易水送荆卿歌爲變徵聲白衣連祖帳單馬去咸京壯
士函頭獻秦王繞柱驚至今燕匕首遺恨匣中鳴

太白樓

太白今何在空餘舊酒樓雄存百篇概高揖萬山秋皓

月自來照黃河不敢流寧知巢父輩附驥亦名留

遙憶

遙憶平安信今朝已到家山妻挑錦字稚子笑燈花不
信歸期杳行看旅鬢華故園霜月影依舊隔窻紗

和人咏竹

倚石根方固過牆節愈堅無風常有韻帶月每生烟秋
草蕪三徑荒蟲感七賢歲寒踈影在不擬受人憐

同陳挹蒼馬洛文蔡鉉升梅岡秋眺二首

亦知秋老去不敢問殘荷牧馬嘶芳草寒鴉占淺莎寺

高聞磬落僧靜得花多勝侶難長聚因風屬短歌
寒花愛少年細草怯涼天黃葉爭飛處青衫一泣然徑
微因有寺江涸偶城田六代興亡迹殘碑豈盡鐫

江村和馬祐上

一曲清江上柴扉迥不關豆花衰草地楓葉釣魚灣紅
認洲邊蓼青知屋外山羨他村女樂薄暮採菱還

由洛口入蒲臺舟次

片舸下蒲津霜天皎月輪浦楊低拂水沙鳥暗呼人鼓
棹驚齊語投竿羨海民那知漂泊子漸與汝曹親

宿葉已畦二棄草堂

既絕人間事何勞架上書看松新雨後莪菊晚涼餘頗
恠棲禽開長憐徑竹踈偶然逢老衲促膝論真如

閣夜

撼閣晚蕭蕭寒江夜上潮數星搖水面一客寄山腰楚
些吟徒切吳楓冷愈凋世途知更險無計狎漁樵

庭桂

庭桂無端發依依又一秋淒涼當玉砌淪落傍朱樓夜
久黃衫濕天香素女愁隣家莫吹笛身在古揚州

壯志

壯志不能酬，憑欄雙淚流。老輕名士價，貧澁稻梁謀。路有要離塚，家無范蠡舟。饑鷹思一飽，會傍獵人鞴。

答友

落魄嵇中散，能文太史公。傷春江雨外，卧病海雲東。洒力禁愁劇，歌筵惡曲終。惟餘惆悵意，不與俗人同。

久客

久客空彈鋏，孤槎類轉蓬。水霜行篋富，松菊故園窮。望六如饑鶩，懷人數斷鴻。一年看又晚，虛滯海雲東。

凍合

凍合關山路，家書久不通。寒煙迷野騎，積雪病歸鴻。披褐身將老，啣杯歲忽終。心灰如宿火，撥盡幾時紅。

吳雲逸觀頤堂詩二首

我懷吳季子，築室遠娛親。富貴非吾樂，家庭自有真。松筠情窈窕，山水味清淳。往返雖千里，天涯卽比隣。徵君愛松菊，令子擷春華。質樸存皇古，文章總大家。溪芹供菽水，山茗淪烟霞。養志差稱足，斑衣未可誇。

鷄冠花

鷄冠無定色秋圃亂殷紅不解啼朝日偏能闕晚風葉
稀翎露骨根老距騰空獨立烟霜裏亭亭氣自雄

期淮陰楊淇一世兄不至有懷

不見子雲久音書亦杳然聞隨南國馬曾泛下江船綠
樹凝離思清淮結暮烟惟餘詩句好把向月明天

宿古巖和尚丈室

夏夜清於水偏宜宿梵宮觀心無定相聽法有虛空野
曠迎新月湖涼足晚風欲將耆舊事頻首問休公

過湖心寺

遠公卓錫處清絕少塵囂爲有高僧住因增野趣饒詩
禪同一乘雲水掛雙瓢自接維摩語余心澹不驕

賀陳翼後新居

新築枚臯里悠然見古懷寧同物外賞不與俗情偕西
閣朝雲爽東籬秋氣佳朋來命文酒亦可雜恢諧

別湖心古巖上人

湖心遊賞地秋色過檐長朗月吟詩伯慈雲坐法王師
留廬岳偈我束秣陵裝他日仍三笑門前泊野航

漢柏

亦隨天地老不是本無情翠色唐前古蒼皮漢後成十
圍霜雨足萬象羽毛輕幸得盤根所端然合太清

久雨新晴三硯齋盆蓮盛開集賦得高字

玉臂潛泥潤香鬢出水高美人臨沼吐仙子狎波濤俯
見魚穿荇傍聽鶴唳皋碧筒宜注酒興入晚晴豪

過柴棗

公瑾屯兵處千年舊跡存荒荒餘霸業小小一孤村鳥
雀投林晚牛羊下坂喧豈知陶處士松菊掩柴門

宿蘄州郭

細雨荒城下停橈望渺然市燈皆近水漁網不歸船
鵲依枝黑江豚逐浪圓守風明日事沽酒犒長年

登太別山

大江分鄂渚漢水下襄陽楚關封疆遠吳收郡國長包
茅誰復貢橘柚久無香惟見人烟外寒潭落照黃

溯漢川

漢陽晴照外別是一山川樹木多臨水人家半在船晨
鷄楚市鬧秋卉蜀江妍向晚霞明滅疑逢解珮仙

宿枝江縣署

仙令鳴琴處高低
摠澗阿天寒喬木少
日晚亂峯多衣
桁因修竹書堂帶
女蘿時時聞虎嘯
不寐且勞歌

寒月

寒月光千頃
羈心此夜迷
江天同一照
山鳥自孤栖
帝闕河車北
蠻鄉太白西
故園窮望眼
空訝玉繩低

九峯著書堂

春色伴幽居
名山好著書
烟嵐相映帶
花柳正扶踈
片席分金谷
孤亭秘石渠
客心先已醉
况乃饌嘉魚

樓前桃

不必玄都觀
桃花也盛開
堪迷漁父棹
疑映美人腮
客子憐將去
遊蜂喜正來
武陵千萬樹
都是使君栽

謝田九峯送新茶

佳茗齋頭至
新泉釜內開
黑甜應却枕
軟飽不頰腮
味鮮將愁洗
香疑帶雨來
湘湖多異種
半屬九峯栽

百斯菴佛樓追憶蔣玉淵二首

故人今不見
見此寓公樓
尙有遺詩在
還餘舊榻留
山陽稽叟痛
勾漏葛洪遊
自別桃源路
高名噪未休

京華同社客
屈指半凋零
舊國傷頭白
殊方遇眼青
踈

燈依古佛廢紙誦遺銘斷鼓殘鐘韻而今我又聽

庭前芍藥限韻

花王春後發爾更馥羣芳紫萼擎晨露紅英綴野塘一
圍金谷煖半剪鄂衾涼賞罷休然燭斜暉未隱墻

坐兩峰間

兩峯如決戰未敢辨雌雄膽落陰崖仄神傷古壑空劉
天無鳥道裂地有鯨宮楚國鏢邪劍還疑葬此中

望紫雲宮

望去疑鄰近誰知仙觀遙兩家分體勢各自挿雲霄

密苔粘壁人微蟻過橋只祈空外侶命鶴一相招

晴色

晴色晝氤氳連峰石皺紋山明因白鳥樹重有黃雲人
影虛空落猿聲下界聞幽棲堪避俗孤鶴在鷄羣

夜聞杜宇

此路接三巴當年蜀帝家魂爲百禽主血作四山花叫
處雲封嶺棲時月墮沙催歸何所益但使髩增華

宿萬全洞

石堂常不夜仰屋似珠明瀑布衝帷出簣管拂枕生人

從天半語日在下方晴竟夕泉聲鬧何由聽鳥鳴

細柳城寓樓卽事柬九峯

梅熟雨潺潺高樓盡日閑水聲將破枕龍氣欲吞山屢
辱金聲擲頻蒙玉饌頒因之有酬答附使入雲還

移寓雲來山閣二首

窅然開異境峻坂亦平蕪又展新屏幃言辭舊画图徑
痕藏萬馬石勢集羣鳥小閣纔容膝真疑借隱壺
直窮三百里盡是使君園處處雲連屋家家水抱村客
眠龍春穩詩據鶴巢尊素練空青意將同杜叟論

早涼

石田雖晝暑草閣喜晨涼稻隴含青遠松烟引素長尖
峰能刺骨細路欲褰裳五月披裘客俱宜住此鄉

別雲來莊

此中爲客久童稚亦知名不厭經年住皆憐冒暑行山
辭遊子屐月桂主人情去路從西閣愁催斑馬鳴

燕子坪

將軍留別墅過客借盤桓石壁山堂古瓜畦野色寬歸
程雲外指秋意暑中看宿處青天近皆霑白露團

上五峯關九環坡

望絕青冥外連峯直際天高低相應答險阻互攀牽關
勢重重壯溪流面面懸容陽形勝好何藉鐵城堅

山樓晨眺二首

隴麥黃如綺林蟬遞響聞一村先見日萬壑尙封雲將
吏趨公早農田望歲勤短衣思射虎閑殺李將軍

高士幽棲地清涼似渚宮夜零神女雨朝散楚王風石
貌能千變花情迥不同慙非忘世客久滯武陵中

嚴子陵臺

先生不受爵抗志老烟霞釣瀨臨千仞青山寄一槎野
雲封石磴空塚覆藤花試問雲臺將於今剩幾家

曉月和呂子郊

夜涼人不寐天曉月方中殘魄依楊柳餘暉映草蟲大
星元自白霜葉向來紅思婦高樓上遼西夢未終

和呂子郊聞鷓鴣

亦知行不得安用爾頻呼意怯臨溪澗身貪入畫圖如
聞促歸去未肯叫提壺遙想黃陵廟神傷鄭鷓鴣

謁范中丞祠二首

王采齋集 卷四 七

異代文丞相當時顏魯公先生高節迥獨與昔人同海
月茫茫白汀霞冉冉紅卽今瞻廟貌猶自起悲風
跋扈今何在孤忠尙爾存擊奸徒有舌報國豈無魂絕
命山河慘行吟日月昏汨羅千載後留此柱乾坤

建寧道中夜泊

旅泊無常處寥寥犬吠村彎弓百戰後擊柝一夫存石
瘦疑人影灘高印屣痕四更纔月上何以度黃昏

至吳門驚聞女殤

却到姑蘇郡驚聞愛女殤夢魂無定據生死太匆忙地

下芳蘭質人間石火光他生業緣在重與作兒郎

九月廿五日金陵遣祁兒歸

千里吾行後思鄉倍黯然一秋如夢裏昨夜忽燈前好
去支門戶休教廢硯田高堂祖母在婉曲奉衰年

歲晚

豪士竟何用相看漸白頭飄零千里道斷續半生愁歲
晚馮驩缺天寒季子裘不知多少恨併在此登樓

巳卯七夕苦熱

七夕逢奇暑何當玉露零斷霞天外赤幽樹檻邊青揮

汗陳瓜果迎涼坐戶庭人間猶不睡柰爾會雙星

過邵伯

挂帆過邵伯極目總洪濤廬舍沉無底舟航勢益高黃
雲飛斷續綠樹渺秋毫正值陽侯怒徒令版鋪勞

中秋夜得月

江城新雨後璧月吐金盤自引清尊罄遙憐玉兔寒秋
毫無不見絕域想同看華髮今如許能禁白露溥

守風二首

便欲張帆去其如朔吹高雨多迷遠峽岸濶湧秋濤世

路雙蓬鬢乾坤一敝袍臨流無個事欹枕讀離騷

每羨歸舟駛鄉山在眼中如何停鷺渚長是傍鮫宮古
戍蘋花雨荒村酒旆風人生盡此境能不哭途窮

泊銅陵

山縣碧重重江關晚樹濃歸樵驅鹿豕藏艇避魚龍古
柿垂丹實秋蘋老素容望中吳共楚于此判題封

江夜

已望真州岸踈燈隔遠林殘螢辭水色宿鳥閉秋心過
去山堪惜酷來酒自斟空江數行役誰與和清吟

往溪齋集 卷四
歷下觀趵突泉

泱水流無地真源欲到天
倒生千仞瀑側注一溪烟樓
觀因終古山光不暮年
石欄倚徙罷勝醉習池邊

題白鷹

白雪裁爲翅黃金點作眸
興來搏狡兔怒罷宿寒韝
神駿應難得風雲若可求
上林方賦獵期汝玉山頭

題章敬夫挂角圖

隨意桐陰坐牛眠亦偶然
攤書芳草地脫幘晚涼天
淪落嗟吾黨精神不暮年
展圖千里外持爾當神仙

黃金臺

燕臺餘故址不復貯黃金
國士千秋報君王一片心
草間無駿骨天外有鴻音
日落悲風起如聞變徵吟

探春花

二月猶冰雪何花敢探春
娉婷舒半蕊隱約露全身
錦幔藏溫玉明窻立美人
無邊桃李艷爭托後車塵

憶山中

山居雖寂寞石隱不清癯
種豆常千架栽瓜滿一區
馴將丹鳥熟釣得錦鱗腴
隨意逢村叟言談自可娛

代頌程竹溪農部赴東省養民併送饑民歸里功
成不伐二首

二東頻失稔粒食竟誰頒農部承恩去輕車設賑還黍
苗欣遍野鳩鵠感如山珍重郇侯雨蒼生幸再攀
大君仍有命安集此哀鴻百室荒殘後千秋再造功豐
碑書岱麓赤子坐春風垂橐歸來日忘言粉署中

雲物樓二首

昔賢曾此地臨眺一躊躇雲片當空大烟光入望舒龜
鳧雙翠表洙泗兩清渠想見占氛祲猶煩太史書

但餘荒隴在不復有高樓迷鳥栖偏擇歸樵徑尙由大
庭何代主梓慎昔年遊今古遙相接茫茫發旅愁

憫敗荷

搖落萬枝紅蕭條碧沼空尙能承曉露微覺畏秋風魚
躍聲常在鷗眠意不同徒然伴衰柳敬側岸西東

次九江

秋風起江漢遊子去何之岸轉疑山動帆輕覺浪遲榜
人能弔古商婦解吟詩拂拭桓伊笛將從月下吹

南海順德縣伏波橋

伏波征九郡曾此立碑題漸入南荒遠回看北斗低雲
鴻秋不度石馬夜能嘶感我憑欄久飄零過五溪

觀音崖

石堂開峭壁古佛坐危龕地入龍居隘禪從鳥道叅峯
巒千臂指江海一燈函到此真忘世疑無勝可探

彈子磯

黃巢挾彈處

樹幽山更碧隱現摠如螺側立奇峰大迴看怪石多奸
難成燼滅樵牧飽經過旅泊宜清夜其如礙月何

登富陽觀山望嚴子陵釣渚

浙西名勝地最數富春江濤嚙生青蘚山虛結翠幢客
星明可摘高士氣難降遠浦漁歌發悠然韵遶窓

往深齋詩集卷四

終



出魚潭絕妙
御書

青蘊山



往溪齋集卷四

川魚相逐於水
物齧生青蘊山

